



事文類聚外集四
山
白
一
五
七

新宮城書藏

加³
77167
37



門 4 3
卷 167
卷 37

新編古今事類聚外集卷之二

賜 蘆 文 庫

南江 富大用

時可 編

金陵 唐富春

子和 刊

東宮官部

三師二少

歷代沿革 **三王** 教世子立太傅少傅以養之 **文王** 世子入則有保出則有師 **成王** 幼在櫺楸太公為太師 **漢高帝** 九年以叔孫通為太子太傅位次太常 **後漢** 太傅一人中二千石禮如師不領官屬少傅二千石悉主太子官屬 **魏** 太傅於太子不稱臣少傅稱臣 **晉** 咸寧中備六傅之職 **東晉** 以景帝諱師故

加 門
號 171
卷 1

東宮

利 207
27

改太師為太保宋三少各一人掌奉皇太子以觀三師之德
以太師太傅太保為三師少師少傅少保為三少唐三
少官不必備唯其人無其人則闕之太子太師太傅太
保各一人從一品少師少傅少保各一人從二品宋師傅不
常設仁宗升儲置三少各一人李文定公以叅知政事兼掌
賓客及陞左相遂進兼少傅此宰相兼官僚之所從始也丁
謂兼少師馮拯兼少傅曹利用兼少保是時實為東官官餘
多以前宰執為致仕官若太子太師太傅太保以待宰相官
未至僕射者及樞密使致仕亦隨本官高下除授太子少師
少傅少保以待前執政其少師非經顧命不除若本官至尚
書即除少傅丞郎給諫只除少保若因遷轉則遞進

太師即遷司徒天禧末皇太子同聽政乃以首相以師
樞使曹利用兼賓客自後東官皆不置開禧二年史同知自
詹事入樞府乃進兼賓客已而太子侍立遂以錢丞相兼太
子少傅明年並置二相左相改兼少師右相兼少傅元置太
子太師太傅太保掌以道德輔導太子少師少傅少保掌明
三師德行以諭太子而論諸道其人不必備

羣書要語凡三王教世子必以禮樂立太傅少傅以養之欲知
父子君臣之道也太傅審父子君臣之道以示之少傅奉世子
以觀太傅之德行太傅在前少傅在後入則有保出則有師是
以教喻而德成也師也者教之以事而諭諸德者也保也者謹
其身以輔導之而歸諸道者也記文王子選天下端士孝悌

博聞有道德者以輔翼之故天子見正事聞正言行正道左右
前後皆正人也 大戴禮 樂正司業父師司成一人元良萬國以
貞 樂正也同主也言樂正教以業父師教以成禮記 尊敬師

傳 詩 國之將興尊師重傳也 漢詔 先王之建太子必擇九德之
師六行之傳 薛綜謝表 實資六傳之賢用弘三善之益 白集嚴

綴制 太師太傅太保掌輔導皇太子少師少傅少保掌曉三師
德行以諭皇太子奉太子以觀三師之道德 唐志 三少之職掌

教諭太子 舊唐書 太子三師以道德輔教太子者也至於動靜
起居言語觀聽皆有以師焉 續通典

古今事實
周召保傅

賈誼上疏曰昔者成王幼在襁緥召公為太保周公為太傅
公為太師保保其身體傅傳其德義師導之教訓此三公之職
也於是為置三少皆上大夫也曰少保少傅少師是與太子宴
者也故乃孩提有識三公三少固明仁孝禮義以道習之遂去
邪人不使見惡行 前漢本傳

廣受師少

疏廣為太子太傅兄子受為少傅在位五歲皇太子年十二通
論語孝經廣謂受曰吾聞知足不辱知止不殆今仕至二千石
官成名立如此不懼有後悔即日父子上疏乞骸骨公卿故人
設祖道供帳送者車數百兩道路觀者皆曰賢哉二大夫 同上本傳

令太子拜

每京頌卷十一集 卷之十一 二十五

晉武帝時有司奏東宮三傅禮義不同帝曰崇敬師傅所以尊
教前世之令典也何論臣與不臣其令太子拜之 晉書

見輒先拜

唐順帝為皇太子禮重師傅見輒先拜 順宗實錄

生即置輔弼

唐太宗謂庶子于志寧曰古者太子既生士負之即置輔弼成
王幼小周召為師是也

請赴資善堂

宋朝仁宗為皇太子宰相丁謂馮拯兼少師少傅樞使曹利用
兼少保參政王曾樞副使兼演兼賓客謂等因請師傅十日一
赴資善堂看客以下隻日互陪侍講學上從之 石林燕語

雜著

雜著

經筵劄子

程頤

三代之時人君必有師傅保之官師道之教訓傳傳其德義保
保其身體後世作事無本知求治而不知正君知規過而不知
養德傳德義之道固已疎矣保身體之法無復聞焉臣以為傳
德義者在乎防見聞之非節嗜好之過保身體者在乎適起居
之宜存畏謹之心臣欲乞皇帝左右扶持祗應宮人內臣並選
年四十五已上厚重小心之人服用器玩皆須質朴應華巧奢
麗之物不得至于上前要在侈麗之物不接於目淺俗之言不
入於耳及乞擇內臣十八充經筵祗應以伺候皇帝起居凡動

息必使經筵官知之有剪桐之戲則隨事箴規違持養之方則應時諫止調護聖躬莫過於此

太子太師

羣書要語師範國儲

唐陸集李勉制輔翼春闈是資教導

公集李勉太師制傳道元子帥長庶僚唐孫述行信安王禕太

師制宜優天秩之榮俾極官臣之位同上作訓元儲許敬宗除

太師制晨謁金墀事切於忠蹇夜隨銀棨義先於調護同上贊

翼皇儲允歸師保曲阜行岐王範太師制來儀博望同上博望

太子苑名官師之尊曲阜行齊之奇制

古今事實

銀印青綬

晉官品令云太子太師銀印青綬

始同三品

長孫無忌為太子太師同中書門下三品同三品自此始唐職

迎崇賢門

晉東宮故事皇子詣崇賢門迎師傅

居詹事府

馮定為太子詹事時宰臣鄭暉為太子太師欲於尚書省上事定奏曰據六典太師居詹事府不合於都省禮上乃詔於本司上事人推美之

詔答辭疾

唐太子承乾與魏王泰交惡當今忠蹇貴重無踰魏徵遣
傳太子慰天下之望羽翼固矣卽拜太子太師徵以疾辭詔答
曰漢太子以四皓爲助我賴公其義也公雖臥病可擁全之唐書

遺表書笏

唐太子太師魏玄成薨太宗謂侍臣曰玄成已沒朕遣人至宅
就其書函得表一紙云天下之事有善有惡任善人則國安用
惡人則國亂公卿之內有愛有憎所宜詳慎若愛而知其惡憎
而知其善去邪勿疑任賢勿貳可以興矣朕思之恐不免斯事
公卿侍臣可書之於笏知必諫也

八十守節

顏真卿改太子太師李希烈陷汝州盧杞乃建遣真卿四方所
信若往諭之可不勞師而定詔下公卿皆失色李勉以爲失
元老貽朝廷羞密表曰臣在河南府南尹鄭叔則以希烈反狀
明勸不行答曰君命可避乎旣見希烈時朱滔王武俊田悅李
納使者皆在坐謂希烈曰聞太師名德久矣公欲建大號而太
師至求宰相孰先太師者真卿叱曰若等聞顏常山否吾兄也
祿山反首舉義師後雖被執詬賊不絕于口吾年且八十官太
師吾守吾節歿而後已豈容若等脅邪諸賊失色唐本傳

八十如儀

盧鈞守太子太師帝元日大饗含元殿鈞年八十升降如儀音
吐鴻暢舉朝咨歎

太子太傅

羣書要語太傅審父子君臣之道以示之

漢賈誼策

寵極腰銀

榮深佩王

記室新書

保傳承華

鄭畋制承華太子門

文選曰遵

彼承華又曰高步承華皆謂太子諸宮○升傳儲宮

曲阜行姚

獨太師制

東朝二品

行蔣九臯太傅制東朝太子朝也

文選曰

東朝既建○漢擇名儒任先疏廣晉崇碩德選在山濤

六帖太

子太傅日就月將琢磨玉質言太子有玉之質琢磨以道也

應

邵漢官儀

詩句灼灼英台戕戕德傳

沈約詩言太子太傅

古今事實

銀童青綬

太子太傅銀童青綬佩蒼玉

輿服志

佩水蒼玉

二傅進賢兩梁冠黑介幘五時朝服佩水蒼玉

諫嗜鮑魚

周文王使太公望傳太子發發嗜鮑魚望曰鮑不登于俎安有非禮之物養太子哉

諫易太子

前漢叔孫通為太子太傅高帝欲以趙王如意易太子通曰太子天下之本本一搖天下震動奈何以天下為戲帝曰吾聽公

言

本傳

視尚書位 百官志

梁太傅一人位視尚書令

以名臣拜
後漢明帝鄧禹先朝名臣拜太傅
以驃騎領

王充以驃騎大將軍領太子太傅
擇保相材

齊王攸為太子太傅獻箴太子曰保相之材必擇賢明
為世儒宗

賀循為太子太傅時朝廷初建動有疑義宗廟制度皆循所定
朝野諮詢一時儒宗矣又循為太傅為世儒宗命皇太子親往

拜之

執子弟禮

晉東宮舊事皇太子於二傅執子弟禮二傳入見太子詣崇賢
門迎太子為二傅拜合卷拜入坐對坐 張勃傳

輦導太子

山濤為太傅講于宣武堂東步輦導太子
躬訓儲官

晉賀循為太子太傅詔曰循清真履道居身以冲約為本立德
以仁遜為行躬訓儲官默而成 中興書

為儲訓

傅暢晉公卿禮秩太傅立草人得書真以為儲訓

傳論語

魯論語二十篇太子太傅夏侯勝等傳之論語序

傳不稱臣

魏太傅於太子不稱臣

見而正服

何夔字叔龍為太子太傅每月朔太傅入見太子太子正法服而禮焉魏志

聞名禮召

吳程秉事鄭元避亂交州與劉熙考論大義遂博通五經權聞其名儒以禮召既到拜太子太傅三國志

召對政容

吳張溫少修節操孫權聞之問曰溫當今與誰為比顧雍曰當今無輩召見占對觀者傾悚權政容加禮拜議郎選曹尚書尋太子太傅吳志

召訪政理

唐趙宗儒太和初進太子太傅文宗召訪政理對曰堯舜之化慈儉而已願陛下守之帝納其言

疾病吟詠

白居易授太子太傅進封馮翊縣開國侯四年冬得風疾伏枕者累月乃放諸妓女素蠻等仍自為墓誌病中吟詠不輟

皆推石奮

石奮孝文時恭謹舉朝無與比太子太傅缺選可傳者皆推奮

遂爲太子太傅奮子慶循行武諱元狩元年立太子選羣臣可
傳者慶自沛守爲太子太傅

卽拜張佚

顯宗始立爲皇太子詔問誰可傳太子者羣臣皆言陰識可博
士張佚曰今陛下立太子爲陰氏乎爲天下乎卽爲陰氏則陰
侯可爲天下則固宜用天下之賢才帝曰欲置傳者以輔太子
也今博士不難正朕况太子乎卽拜佚爲太子太傅共爲少傅
後漢桓榮傳

奉觴爲壽

踈廣字仲翁爲太子太傅廣兄子受爲少傅宣帝置酒太子躬
奉觴以爲壽上甚嘉之後竝上疏乞骸骨

詳見總六傳

別案奉對

唐太宗伐高麗高士廉攝太子太傅仍典朝政皇太子下令攝
太傅申國公士廉朝望國華儀刑攸屬寡人忝膺監守實資訓
導此日聽政常屈同榻庶因咨白以祛蒙蔽但據案奉對情所
未安所司宜別以一案供太傅

素服報恩

漢夏侯勝爲太子太傅受詔撰論語年九十卒太后爲勝素服
五日報師傅之恩儒者以爲榮

漢書

賜第私讓

唐于志寧遷太子太傅常與右僕射張行成俱蒙賜第志寧奏
曰臣居關右代襲箕裘周魏以爲基址不墜行成等新營住宅

尚少田園於臣有餘乞申私議

太子太保

羣書要語保也者謹其身以輔翼之而歸諸道者也文王世子

召公為保書君奭凡三王教世子入則有保記詳見總六傳入

則有保保其身體賈誼疏春宮保氏曲阜徐文金制春宮三

太名秩甚尊同上行蘇頌太保制

古今事實

以開府加

劉寔字子真以特進開府加太子太保王隱晉書

以特進行

懷帝以荀組為侍中特進行太子太保晉中興書

能保吾子

後魏顛祖將禪位於京兆王子推陸馥抗言皇太子聖德承基四海屬望臣請勿顛毀廷有死無二久之帝意解語曰馥直臣也其能保吾子遂以為大保

德導太子

唐蕭瑀為太子太保太宗曰三師以德導太子者也禮不尊則無所取法

詣朝五奏

張茂昭憲宗元和二年詣朝五奏乃聽願留不許加兼太子太寵異分班

宋朝上溥乾德二年罷為太子太保故事一品班於臺省之後
太祖因見溥曰溥舊相官寵異之即令分臺省班於東西國史

太子少師

古今事實

太子親拜

唐貞觀初李綱為太子少師為陳父子君臣之道問寢視膳之
方聽者忘倦太子嘗商確古來君臣孝忠盡節之事綱凜然曰
託六尺之孤寄百里之命古以為難綱以為易每吐論發言辭
色慷慨有不可奪之志太子未嘗不聳然禮待又綱有脚疾而
不堪踐履太宗令輿入東宮皇太子引上殿親拜之

太子行拜

房玄齡為太子少師時皇太子將行拜禮備禮以待之玄齡厚
自推損不敢修謂識者重其崇讓又曰姚崇事當考

議選蕭俛

文宗議選舊德保護東宮乃以太子少師召蕭俛

詔選玄齡

正觀中房玄齡為太子少師玄齡遜位詔不許太宗因謂侍臣
曰太子師保古難其選

分給院錢

王起改太子少師起治生無檢所得祿賜為童婢盜有貧不能
自存帝詔曰益仙韶院錢議者謂與院臣分給可耻也起賴其

人不克遜

特賜步輿

李綱拜太子少師綱素有脚疾太宗特賜步輿令乘至閣下數引至禁中間以政道

乘馬入省

許敬宗為太子少師乾封初以年老不能行步特令朝日乘小馬入禁門至內省

兩李少師

元和以來宰相有兩李少師故以所居別之一曰靖安少師一曰永寧少師職林

黃瓠少師

後魏郭祚領太子少師祚從世宗幸東宮明帝幼弱持一黃瓠出奉之時謗祚者號為黃瓠少師

太子少傅

羣書要語少傅奉世子以觀太傅之德行而審諭之記漢桓榮

之賜輜車晉山濤之乘小輦記室新書漢用名儒任先疎受晉

推碩德選在羊公孔白六帖宮傅之亞淇水制可領調護之任

白集行嚴綬制俾登儲副之榮宋朝歲表太傅少傅並不朝朔

望漢故事

古今事實

張良臥傳

事類彙編

卷之二

十三

漢高帝謂張良曰子房雖疾彊臥傳太子時叔孫通已為太傅
張良行少傅事

匡衡即對

匡衡為太子少傅數上書陳便宜及朝廷有政義即議經以對
言多法義上以為任公卿

接以賓禮

王儉拜太子少傅朝議太子接少傅以賓友之禮

南史

賜以車馬

後漢桓榮字春卿顯宗立為皇太子以榮為少傅賜以輜車乘
馬榮大會諸生陳其車馬印綬曰今日所蒙稽古之力可不勉
哉並漢書

賜乘小輦

晉山濤為少傅拜太子求退帝賜小輦乘之以訓太子

白六帖

三世傳東宮

吳薛綜為太子少傅子榮孫皓時為太子少傅晉平吳子兼事
元帝亦為太子少傅自綜至兼三世傳東宮

西南謝太子

孝明帝在東宮宣武皇帝欲以崔光為太子師傅光固辭帝令
太子南面再拜宮臣皆從太子拜光北面立不敢答拜唯西面
拜謝而出乃授太子少傅

秉德履道

山濤轉少傅詔曰秉德冲素心思潜通清虛履道有古人之風

秉德尚義

山公啓事皇太子始之東宮四海屬望保傳不可不高天下之
選羊枯秉德尚義克已復禮又尚年少可久其事

外叅傳訓

周顛字伯仁拜太子少傅上疏曰臣學不通一經智不效一官
乃欲使臣內管銓衡外叅傳訓質輕蟬翼事重千鈞此之不可
不待議而明矣 晉中興書

得輔道義

華廙字長駿遷少傅得輔道之義

不言之益

周顛拜少傅詔云有不言之益 並晉書

以老乞辭

唐張行成拜左僕射太子少傅未幾四年二月不雨至五月行
成懼以老乞身制答曰古者策免垂罪已之義朕寡德非宰相
答乃賜宮女黃金器勅勿復辭行成固請

賜三傑詩

源乾曜爲少傅與左右丞相宋璟張說賜宴尚書省帝賦三傑
詩以賜 並唐書

定二傅拜

何曾議太子少傅當稱臣拜首顛曰太之與少自二傅之名次
爾非於天子有輕重也詔曰秦漢以來舊章廢滅隨時改作其
舊不可依用宜准古義遂定二傅不拜

疏受閑雅

疏受為少傅辭理閑雅

王丹正直

王丹為少傅名德重於當時又東觀漢記丹為少傅蹇蹇正直為太子少傅魏志

古今文集

雜著

少傅箴為太子少傅作

傳立

箴曰正人在側德義盈堂庖肆先入蘭臺不芳傳臣司計敢告君王

一又後魏時為少傅以調護是職乃作蕭圓

箴曰愛惜日力寸陰毋棄親膳再飯寢門三至小心翼七天老
忝忝詢謀計慮問對疑丞安樂必敬毋忘戰兢

太子少保

羣書要語東朝保傅歷代尊榮自集行嚴殺少保制亞保春坊

淇水

古今事實

知公直士

唐李綱兼太子詹事頗乞骸骨高祖慢罵之曰建成在東宮遣卿輔導何為屢致辭乎綱頓首陳謝曰云陛下功成業泰頗自矜伐臣事太子所懷鄙見復不採納高祖謝曰知公直士勉

事文類聚外集

卷之一

十六

忠壽堂

弼我兒於是擢太子少保上書太子曰綱備立保傳冀得效愚
鄙殿下飲酒過量非養生道凡為太子務孝謹以慰上心不宜
聽受邪說與朝廷生其間太子不懌

手勅稱名

李綱為太子少保高祖以其隋氏名臣甚加優禮手勅未嘗不
稱名其見重如此 並唐書

賦詩歡會

唐李適之為右相李林甫密奏其好酒頗妨政事元宗惑焉乃
除太子少保適之遽命親故歡會賦詩曰避賢初罷相樂聖且
銜盃為問門前客今朝幾箇來舉朝服其度量

一 太常換散秩

長慶中以兼太常卿趙宗儒為太子少保太常有師子樂構玉
方之色非朝會聘享不作焉至是中人掌教坊之樂者移牒取
之宗儒不敢違以狀白宰相宰相以為事在有司執守不令關
白而宗儒憂恐不已宰相懦怯不任事故以散秩

輔臣領東宮

宋朝天禧四年以資政殿大學士王欽若為司空職如故欽若
以輔臣兼領東宮三少品序非便表換秩故有是命

新編古今事文類聚外集卷之一

終

宋開天書四手以資短類大學士王為首官后空類收外

轉至殿東宮

自而宗肅憂恐不日宰朕肅以事姑以措楚

之宗肅不效數以狀自宰朕宰朕以為事五首后難守不令聞

大之身非障會朝享不計法至長中人掌焚之樂法然對

具與中心謀大計

新編古今事文類聚外集卷之二

南江

富大用

時可

編

金陵

唐富春

子和

刊

東宮官部

太子詹事

少詹事

歷代沿革

秦官 應邵曰詹省也給也

秩二千石 漢因之掌太子

家位在長秋上賓嬰太后兄子景帝即位為詹事文帝以鄭

當時為景帝詹事昭帝以韋賢為詹事成帝鴻嘉二年省

漢省詹事太子官屬悉屬少傅 魏復置詹事領東宮眾務

以保傳位尊不宜親細務武帝咸寧初用黃門侍郎湯詵為

事文類聚外傳

詹事掌東宮之任後省江左復置齊置府領官屬梁任總

官朝有太子左右詹事北齊東宮衆事無小大皆統之

唐置詹事府詹事一人正三品少詹事一人正四品上掌內

外衆務糾彈非違總判府事置少詹事以貳之龍朔改端尹

少尹咸亨復置拱改宮尹神龍復宋東宮官有詹事仁宗升

儲置詹事二人神宗欽宗升儲並置二人多以他官兼充從

三品少詹事正六品元置太子詹事從三品掌知東宮內外

庶務統領判院事少詹從四品掌貳詹事

羣書要語儲端任顯東西兩晉茲選持難注儲端太子詹事也

沈約齊安陸碑 官端 江總為官端分紀 詹事彈肅一宮 王璠卷

徐龜書 彈違是屬宜肅事於東朝 嗣許王太子詹事制 儲端

重寶異常司 陸倕表 官坊清班 白集行張偉制 龍樓上條 宋

制 弼諧儲副必俟才英總務官端允資忠蓋 李寬冊 漢朝選德

禮儀峻於賓卿晉代任賢光榮歸於謝琰 博望斷裁之規與

情僉屬承華彈肅之寄任賢斯在 並同上 尚居端尹之榮 李藩

制 皇太子霞寨青殿日晃宮駕紫谷之英振洛笙之響自非

器上白雲韻同明月何以延芳芝苑插羽瓊條寶嬰戚貴於西

京陸曄風嘉於東國伊人之美方曰可舉 孔穉圭表

青綬

青綬

晉詹事品第三銀童青綬絳朝服兩梁冠

衣錦

事文類聚外傳

唐張行成轉太子少詹事太宗東征太子於定州監國即行成
本邑太宗謂行成曰送公衣錦還鄉於是令有司祀其先人墓
雅意墳史

劉憲遷太子詹事時玄宗在東宮雅意墳史憲曰殿下儲副非
以尋章摘句要通大意而已侍讀儲元亮經明行修宜召問以
察其言

妙選賢材

晉武帝以王恭為太陽尹領太子詹事恭讓表曰今日王儲始
建四方是式總司之任崇替所由宜妙選賢材盡一時之勝
霸以經授

孔霸宣帝時以經授太子為詹事

漢書

珽上書諫

姚珽遷詹事兼左庶子節愍太子稍失道珽凡四上書諫中宗
嘉歎焉

椽禮當集

馮定改太子詹事鄭覃兼太子少師上曰欲會尚書省定椽禮
當集詹事府論者多其正

征羗有功

晉謝琰征羗有功為輔國將軍領太子詹事

舅得詹事

張說女嫁盧氏嘗為舅盧公求官候父下朝而問焉父不語但
相楮床龜而示之女歸告其夫曰舅得詹事矣

弟代詹事

鄭縱字利用為太子詹事縱卒弟代為詹事

不得詹事

羊琇少與武帝同年相愛常謂帝曰若得天下用我為領護軍太子詹事武帝即位琇但為左衛將軍不得詹事也

負外詔歸

嚴挺之徙絳州帝顧林甫曰挺之安在此其材可用林甫召其弟損之曰天子視絳州厚要當以事自解歸林甫見上且大用因給挺之使稱疾即奏挺之春秋高有疾幸得閑官自養帝恨此久之乃以為負外詹事詔歸東都

長史屈除

高宗為皇太子轉李勣太子詹事右弼率太宗謂曰我兒新登儲貳卿舊長史故有此除雖屈階資可勿怪也 並唐書

弼諧審喻

唐李綱為太子詹事太子嘗遊有進魚者太子使膾之唐儉趙元鼎自言其能太子曰操刀膾腥和鬲味公等善之若弼諧審喻則屬綱矣

文華無籍

陳後主在東京欲以江總為詹事孔奐曰江總有潘陸之才而無園綺之實輔弼儲貳切謂非宜後主深以為恨乃自言於宣帝將許之奐乃奏曰江總文華之人今皇太子文華不少無籍於總如臣愚見願選敦重之才以居輔道帝曰誰可奐曰都官

尚書王廓代有士德立性敦敏可以居之後主時在側乃曰廓主泰之子不可居太子詹事與又曰宋朝范曄即范泰之子亦為太子詹事後主固爭之帝遂以總為詹事

古今文集

雜著

辭免兼太子詹事奏狀

周必大

錫命自天措身無所臣竊惟儲端華重今昔所同漢韋賢質樸篤學始膺委任唐李勣至於舊長史屈階資而為之近歲以來非老成端諒然為世所推則必於近臣中擇嘗任王府講讀及官僚者就兼是職苟或異此寧虛厥官如臣不肖行能淺薄既無素望又非舊人驟預選掄實駭群聽此臣所以彷徨震怖不敢自恕而但已也伏望陛下重青宮之屬軫黃屋之思勿以反汗為難而以掄材為急朝多英望亦有舊僚改而命之庶叶公論冒輸懇悃必冀矜從

左右諭德

歷代沿革 龍朔中置左右諭德各一人掌侍從贊諭職擬常侍掌諭皇太子以道德隨事諷贊皇太子朝宮臣列侍左右階出入騎從 宋東宮官有左右諭德建儲則置否則闕仁宗神宗欽宗升儲皆置二人並他官兼乾道置一人惟除左不除右 元置左右諭德掌諭道德侍從文章之事

羣書要語東宮之有諭德猶上臺之有騎省清班優秩所選非

事文類聚卷之二十一

輕白集元祐制東朝諭導杜牧除郭錡制就列官坊申贊諭之

美白居易行崔承寵制

詩句直道侍太子昌言沃宸聰文選

古今事類

卿是東寮

唐德宗拜崔辛為諭德辛對東宮曰臣不識朝廷典故見殿下合稱臣否東宮曰卿是東寮

公可大用

宋朝仁宗在東宮魯質肅公宗道為諭德一日真宗召使者及門而公不在移時乃在肆中飲歸中使遽先入白乃與公約曰上若怪公來遲當託何事公曰但以實告中使曰然則得罪公

曰飲酒人之常情欺君臣子之大罪中使嗟歎而去真宗果問使者具如公對自此奇公以為忠實可大用言行錄

楊汝礪兼

楊礪字汝礪真宗為襄王以礪為記室王甚重之東宮建兼右諭德真宗即位召入翰林為學士東都事略

陳彥升擢

陳薦字彥升神宗為穎王薦為王府記室參軍神宗為皇太子擢右諭德

左右衛率府率

歷代沿革衛率秦官屬詹事漢因之後漢主門衛徼循衛士而

事文類聚卷之二十一

屬少傅魏因之晉武帝建東宮置衛率初曰中衛率太始五年分為左右衛率各領一軍後又置中衛率是為五率宋元嘉中置太子右衛率永初元年置太子後衛率梁左右衛率各一人隋左右衛各置率一人副率二人掌宮中禁衛唐左右衛率府率各一人副率各一人掌東宮兵仗羽衛之政令總諸曹之事宋太子諸率府從七品元置太子左右衛率府率掌同衛導從儀仗事

羣書要語凡太子出前衛率導在前黃麾外左右二率從挾道輿車後衛率從在烏皮外並帶戟執刀其服並視左右衛將軍晉志凡正至太子朝宮臣率其屬儀仗為左右廂之護衛出入如鹵簿之法唐職官志

事

身居三職

李大亮拜左衛大將軍十七年晉王為皇太子東宮寮屬皆盛選宮臣以大亮兼太子右衛率俄兼工部尚書身居三職宿衛兩宮甚為親信大亮每當直必通宵假寐太宗勞之曰當公宿直我便安臥

品為第三

隋宇文述每與晉王謀事及晉王為皇太子乃以述為左衛率舊令率官第四品以述素貴遂進率品為第三其見重如此

文武信義

太子左率缺宜得其才無疾患者城陽太守石崇忠謹有文武

河東太守焦勝清正著信義皆其選也 山谷啓

清和理正

車騎將軍荀悝山濤舉之為太子右衛率稱清和理正從容顧問動可觀采真侍衛之美者

褚斐才藝

褚斐幼失父以才藝堪幹立名肅宗即位徵拜屯騎校尉遷太子左衛率 晉中興書

郗儉風神

郗儉為太子右衛率恢長八尺美鬚髯風神魁梧烈宗異之 卿當獨步

徐陵父摛為左衛率又表淑為太子左衛率謝莊為太子中庶

子時南平王獻赤鸚鵡普詔羣臣為賦淑文冠當時作賦畢示莊及見莊賦歎江東無我卿當獨秀我若無卿亦一時之傑遽隱其賦

書責遊巖

唐蔣儼除太子右衛副率時徵隱士田遊巖為太子洗馬在宮無所補儼貽書責曰足下負巢由之峻節傲唐虞之聖主養煙霞之逸氣守林壑之遁情主上屈萬乘之重申三顧之榮遇子以商山之客待子以不臣之禮將輔導儲貳漸染芝蘭爾皇太子春秋鼎盛聖道未周足下受調護之寄是可言之秋唯唯而無一談悠悠以卒年歲遊巖不能答

謀廢賈后

晉劉卞為愍懷太子左率知賈后必害太子乃問張華華曰君欲如何卞曰東宮雋又如林四率精兵萬人公居阿衡之任若得公命皇太子因朝使錄尚書事廢賈后於金墉當黃門力耳華曰廢立大事又非所能賈后微聞遷卞為雍州刺史卞恐誅乃飲藥卒

僕正

歷代沿革僕秦官漢世太子五日一朝非入朝日遣僕及中允旦入請問起居後漢太子僕一人千石主車馬職如太僕晉詹事屬官有太子僕銅印墨綬進賢兩梁冠終朝服品第五主輿馬兼主親族如太僕宗正宋齊品服同家令從駕乘安

車次家令陳太子僕視黃門隋僕寺置一人唐龍朔中政僕寺為馭僕寺改僕為大夫掌車輿騎乘儀仗之政令及喪葬之禮物辨其次序與其出入而供給之元置太子僕正掌車正收弓箭儀物事又太子副僕正掌二僕正

古今事考

柳肅面折

隋柳肅遷太子僕太子廢坐除名為民大業中帝與段達語及庶人罪狀達曰柳肅在宮大見踈斥帝問其故荅曰學士劉臻嘗進童仇太翼於宮中為巫蠱事肅知而諫曰殿下帝之冢子位當儲貳誠在不孝無患見疑劉臻書生鼓搥唇舌適足以相誑誤願陛下勿納之庶人不懌他日謂臻曰汝何故漏洩使柳

蕭知之令面折我

左贊良善

歷代沿革置左贊善大夫正五品上掌傳令諷過失贊札儀以經教授諸郡王龍朔二年改太子中允為之咸亨元年復置中允而贊善大夫不效又加置五人職擬諫議大夫掌翊贊太子以規諷也皇太子出入動靜苟非其德義則必陳古以箴焉宋贊善皆綠舊制除授而無職司元置太子左贊善掌道德侍從文章之事

古今事實

先諫官言事

唐白居易授太子左贊善大夫七月監殺宰相武元衡居易首上疏論其冤急請捕賊以雪國耻宰相以官官非諫職不當先諫官言事會有素惡居易者倚據居易言辭浮華無行貶江州司馬

左右監門

歷代沿革文帝置擬監門將軍各有直長十人左右監門率各一人副率二人掌諸門禁煬帝改為宮門候唐左右監門率府掌東宮禁衛之法凡東宮諸司應以籍入于宮殿者皆本司具其官爵姓名牒門司門司送于監門監門之主與判曹印署送于門司門司會之同則聽入凡東宮內外門之守

者並司其出入凡財物器用之出入於宮禁者皆以籍傍為據左右監門以出入之若皇太子出入則依鹵簿之法率其屬於牙門之左右以為捍守番拱中改左右監門率為鶴禁衛宋亦有左右監門因之各掌門衛禁

典儀 附 贊儀

歷代沿革 置中庶子貞潔太子太傅屬官有庶子後漢因之 魏晉太子詹事有中庶子各四人局擬散騎侍郎品第五絳朝服武冠平巾幘掌禁令糾正違闕侍從左右儼相威儀蓋規獻納奏事文書皆典綜之釋奠中庶子扶左庶子扶右隋庶子之職掌侍從贊相禮儀較正啓奏有太子典儀掌

司贊禮儀事

侍正 附 侍丞

歷代沿革 齊太子有內直梁有內主壘主衣扶侍等局各置有司以承其事陳因之隋門下坊領內直監唐因之職擬尚輦奉御龍朔二年改太子內直郎掌符璽繳扇几案衣服之事元置太子侍正掌冠帶衣服左右給使之事丞隨侍正輔丞之事

典食令丞 附 掌領令丞

歷代沿革 漢詹事屬官有食官令長丞後漢太子少傅屬官有

太子食官令一人秩六百石主飲食晉食官令職如太官令
宋中庶子屬官有食官令齊詹事屬官有食官令職儀食官
令一人掌厨膳之事建元中置食官丞四人梁庶子有食官
局食官丞陳因之後魏五品上北齊令丞又別領器局酒局
工丞太子食官丞一人門下別置典膳局監丞各二人隋改
為典膳正家令寺統食官令丞唐食官署令一人從八品下
掌領膳之事丞二人為之貳從九品下元置太子典食令典
食丞掌侍奉肴饌又掌飲丞各一人掌奉香藥酒等事

古今事實

減膳上書

唐刑文偉遷太子典膳丞時孝敬在東宮罕典官臣妾見文偉
輒減膳上書曰竊見禮記曰太子既冠成人免於保傅之嚴則
有司過之史徹膳之宰史之義不得司過宰之義不得不徹
膳不今皇帝式稽前典妙簡英俊自庶子已上至諮議舍人及
學士侍讀等使翼佐殿下以成聖德近者以來未甚延納談議
不狎謁見尚稀三朝之後但與內人獨居何由發揮聖智使睿
哲文明者乎今史雖關官掌當奉職恭備所司不敢逃死謹守
禮經輒申減膳太子谷曰顧已虜虜早尚墳典每欲研精政術
極意書林但在幼年未閑將衛竭誠耽誦因即損心比日以來
風虛更積中奉恩旨不許重勞所以屢闕坐朝時乖學緒公潛
申勗戒式薦忠規敬尋來詣良符宿志自非情思審諭義均溺
諸豈能進此藥言形於簡墨撫躬三省感愧兼深文偉自此益

知言

司經

歷代沿革 **晉**太子詹事屬官有洗馬八人掌皇太子圖籍經書
 職如謁者局准秘書品第七班同舍人下絳朝服進賢一梁
 冠黑介幘 **宋**亦置八人 **齊**一人 **梁**八人班第六正七品 **陳**因
 之 **北齊**二人從五品上 **隋**門下坊司經局置四人從五品下
周因之龍朔二年改為太子司經大夫咸亨元年復舊神龍
 二年改司經局曰桂坊罷隸左春坊領崇賢館三年改司經
 大夫曰桂坊大夫糾正違失掌經史子集四庫圖籍刊緝之
 事立正本副本貯本以備供進凡天下之圖書上於東宮者
 皆受而藏之 **元**有太子司經又有副司經掌經史圖書筆硯
 等事

古今事實

才望充職

梁庾於陵拜太子洗馬舊東宮官屬通為清選洗馬掌文翰尤
 其清者近代用人皆取甲族有才望者時於陵與周捨並擢充
 此職武帝曰官以人而清豈限以甲族時論美之

文雅登朝

荀邃字道玄拜太子洗馬戴若思特見欽重作詩頌之曰洗馬
 荀道玄既累葉重光才經文雅所以弱冠登朝 荀氏家傳

童奏作草

高文頌 卷之三十一 十一 德壽堂

江統字應元召補洗馬每有疑滯大事章表奏議輒為同官所推常為之作草文士傳

俸料由已

唐常袞為相先是百官俸料寡薄袞與宰相楊綰奏請加之時韓滉判度支袞與滉各聘私懷所加俸料厚薄由已太子洗馬實司經局長官文學為之貳袞有親戚任文學者乃給十二千而給洗馬十千其輕重任情如此

侍藥

附 奉藥

歷代沿革 **北齊**門下坊領藥藏局有監丞各二人正六品下侍藥四人正七品下 **隋**門下坊領藥藏局監丞一人侍藥四人

監正七品下 **唐**改為太子藥藏郎掌和劑醫藥之事丞為之貳凡皇太子有疾命侍藥入診候以議方藥應進藥命藥僮擣篩之侍藥和成之將集官臣監嘗如尚藥局之職 **元**置太子侍藥太子奉藥常承奉醫藥

都監

附 同監

歷代沿革 **晉**有太子寺人監負 **隋**文帝始置太子內坊有典內等員 **唐**典內掌東宮閣內之禁及宮人糧廩賜予之出入凡任典直以儀式道客主之僧序任閣帥以門戶任內閣以出入任給使以繖扇任內廐以車輦任典事以牛馬典內統而監主之 **元**有都監同監掌東宮閣內儀物等事

司倉 附 副司倉

歷代沿革 後漢太子少傅屬官有太子倉令一人六百石主倉
穀魏晉已下無聞後魏第五品中北齊家令寺領典倉署令
丞隋典倉丞二人唐典倉署令一人掌九穀入藏之教及醢
醢庶羞器皿燈燭之事舉其名數而司出納凡諸園圃樹藝
者皆受令焉丞二人判署事元置太子司倉副司倉掌倉出
給及薪炭等事

家令

歷代沿革 家令秦官屬詹事漢太子食湯沐邑十縣家令主之
後漢太子少傅屬官有家令秩千石主食庫飲食職比廷尉
魏因之晉家令品第五銅印墨綬進賢兩梁冠絳朝服宋齊
清流皆不為之隋煬帝改家令為司府令唐改為家令寺龍
朔二年改家令寺為官府寺家令為官府大夫元置太子家
令掌司禮儀法等

羣書要語張晏曰太子稱家故曰令 家令之職掌皇太子之
飲膳倉儲廩藏之政令總食官典倉司藏三署之官屬凡皇太
子備禮出入用乘朝車具威儀先諸臣以導引若祭祀賓客則
供酒食以為獻主 六典 太子家令主倉穀飲食職似司農少府
後漢百官志本注 太子家令主內茵褥牀几諸供中之物及官
奴婢月用錢內庫鹽米車牛刑獄 宋書

以智囊稱

漢晁錯上書言人主所以尊顯功名揚於萬世之後者以智術
數也皇太子材知高奇然於術數未有所守上於是拜錯為太
子家令以辨得幸太子太子家號白智囊

以賢良舉

疏受以賢良舉為太子家令

補吏部郎

晉武帝詔曰太子家令陸亮有忠心可補吏部郎

諫出遊觀

譙周後主為太子以周為家令後主頗出遊觀增廣聲樂周上

疏諫曰昔王莽之敗豪傑竝起跨州據郡欲弄神器世祖初入
河北賢才智士思望所歸未必以其勢之廣狹惟其德之厚薄
也 蜀志

特被親遇

齊文惠太子入居東宮沈約為步兵校尉管書記時中宮多士
約特被親遇每旦入見影斜方出尋遷太子家令

文號宮體

梁徐摛屬文好為新變不拘舊體為皇太子家令兼管書記文
體既別春坊蓋學宮體之號自斯而起

婢識家令

沈約嘗侍宴梁武帝有妓婢師是齊文惠太子宮人帝問識座

中客否曰唯沈家令約伏地流涕帝亦悲焉為之罷酒

司藏

歷代沿革 **晉**家令主物吏四人 **梁**庶子属官有錫賜庫局又有東宮衛庫 **北齊**家令寺領司藏署令 **承** **隋**家令統司藏署令 **丞** **唐**司藏令一人掌庫藏財貨出納營繕之法式丞二人判署事 **元**置太子司藏副司藏掌庫財貨出入之事

新編古今事文類聚外集卷之二 終

新編古今事文類聚外集卷之二

南江 富大用 時可 編

金陵 唐富春 子和 刊

睦親府部

判睦親正事

歷代沿革 判睦親正事 **即** **宋**之大宗正司也自仁宗景祐三年始置大宗正司以皇兄江寧節度使允讓皇侄彰化軍留後守節同知大宗正事時宗室子孫眾多聚居大第故于祖宗後各擇一人知宗正事令敘睦之違則糾其失焉元豐官制行詔大宗正司不隸六曹大宗正以宗室團練以上有德望

者為之次一人為同知位高屬尊者為判掌糾合族屬而訓之以德行道藝受其詞訟而糾正其愆違有罪則先劾以聞法例不能決者同上殿取裁凡宗室服屬遠近之數及其賞罰規式皆總之屬有記室一人掌成奏講書教授十有二人分位隸授兼領小學之事崇寧元年蔡京請宗室非袒免親以下兩世欲於西京南京遷輔每處置敦宗院光宗即位改為睦宗院元置睦親府掌敦睦糾率宗屬欽奉王事有判睦親正事以宗室中屬尊者充又有同判睦親正事同簽睦親正事並以宗室充又置睦親正丞及知事諸睦親將軍副將軍檢法等員

羣書要語以親九族九族既睦書堯典周家忠厚故能內睦九

族詩行葦親親以睦氏木二從九親別踈睦之族張晉傳整訓

屬族次第昭穆杜牧行李又學制選諸近屬之尊董我大宗之

秩曾子宣行宗晟制司典屬藉克有令名東坡除宗晟制惟我

公族統于大宗崇敘訓齊創宏規於文祖錢勗除宗晟制總訓

齊於屬籍宗景制惟時賢亮司我本支胡文恭行宗彊制董正

宗牒賜允弼詔首秉宗司同上資大德之風成賴九宗之治正

胡文恭集董正宗籍賜允弼內以糾正於宗支元厚之除宗伯制

古今事實

領宗正務

李勉都領宗正之務鄴侯家傳

定請書規

事文類聚卷之三十一 德壽堂
治平元年判大宗正事允弼言詳定到皇親讀書等賞罰規式
詔依所定次第施行 四朝國史

訓導行藝

神宗太宗正司同知官各一人以宗室團練使以上充掌宗室
之教法政令以行藝訓導而敦睦之受其辯訢之事而糾其失
違罪即先劾以聞即法例有疑不能決者同上殿取裁

舉劾遇失

景祐二年二月大宗正司言皇族凡有違越過失請從本司舉
劾從之

置自訟齋

趙宜簡公不息字仁仲知大宗正事始置自訟齋請賜書使宗
室有過者讀焉奏修宮學添弟子員訓勉宗室先教養後法戒
薦其秀傑者數十人多至通顯所論天下事尤多

築聞義室

英宗在藩邸凡宗室人材能否皆詳知之頗賢宗惠及即位擇
宗惠為同知大宗正事告以選任之意宗惠乃即所居築室曰
聞義日與學士大夫講肄其間以身倡率宗屬

焚劄子檢

趙不息為大宗正司時歲大旱一日進九劄子上即施行退而
焚其檢上知其忠親信之宴禁中公前為壽上令公滿酌飲之
醕謂皇太子及嗣濮王等曰此賢宗室也 葉水心集

詳酌奏請

景祐三年始置大宗正司以允讓與守節同領其事凡有奏請不得專達以宗正司詳酌而後以聞所以勉進其敦睦而糾正其愆失也

賜鞍馬

皇祐三年以允讓知大宗正事守節同知大宗正事仍賜襲衣金帶鞍馬時宗室子孫衆多方聚居於大第故於祖宗後各擇一人令敦睦之違失則糾正焉凡宗室奏陳先委詳酌而後聞
仁宗實錄

賜甲第

仲忽入判大宗正事徽宗賜之甲第建親賢懋功之閣以示寵
仲忽鯁亮端毅動循禮法立宗司法式
四朝國史

父子司宗

元豐七年以宗景知大宗正事先是宗景入允弼司宗久故神宗復選而用之使諭其母先王久司宗正德及皇族令命而子繼之夫人宜多慰也
四朝國史宗景

古今文集

雜著

增置同知大宗事詔

其略曰夫明德以親九族正家而刑萬邦古先哲王罔不由此朕嗣守丕業率循舊章惟星屬之敦和命宗臣而董正念其性本於仁厚宜廣學以勤修顧其日益於衆多必增負而統理庶乎協贊其職並修厥官式孚于休以副予意

事文類聚卷之三
德書室刊

賜士儻辭免太宗正司不允詔

朕惟卿資宗室之英擁將旄之重俾統盟於庶族用蕃屏於行朝庶籍本枝之強永圖龜鼎之固雖中外屬阽危之會而職休惟同姓之均蓋體詔恩即抵官守懇辭之語朕未欲聞所乞宜不允故茲詔示想宜知悉

睦親正丞

歷代沿革神宗熙寧三年置丞三員以異姓朝臣充都官員外郎張稚圭知丞事光祿寺丞李德初同知丞事神宗疑用異姓王安石言前代宗正固有庶姓時乃錄春秋時公族大夫事神宗曰此雖無前代故事行之何害安石曰聖人創法

不必盡循前代所已行者於是召稚圭對而命之元豐五年

詔太宗正丞中書省奏差以文臣京朝官知丞置丞三人因

舊制也

羣書要語晉丞瑤籍慶元制爰禪訓齊往分糾正同上贊治公

姓人無間言曲阜集知太宗正丞崔公慶制

古今事實

相不能屈

田晝字承君人物雄偉議論慷慨俱有前輩之風入為太宗正

丞宰相曾布欲收置門下不能屈言行錄

自守無訕

曾恬少事楊時謝良佐陳瓘得存心養性之學及為太宗正丞

德書室刊

秦檜專政士求媚以取要官恬自守無所詘

中興條年錄

條上五事

知大宗丞謝伋上宗室五事曰舉賢才以強本支更法制以除煩苛擇官師以專訓導繼封爵以謹傳襲修圖牒以辨親疎詔內外從官各舉宗室一人始立法大嚴學官久闕襲封之典遂廢宗正有寺無官故伋言之時用伋議惟襲封食

古今文集

古詩

送王龜齡赴越州宗丞

周必大

冊府號冀北一時聚奇材嗟我雖未至尚及相追陪胡子真老驥元童蓋龍媒爾來厭名韞蹇踏遊九垓王子乃汗血疑是西

極徠忠精貫日月聲名震陪儂君王市駿骨得此七尺駉秣以天山禾貯之黃金臺王勒繡羅鞍映帶文錦鞵謂言開道路亦復薄蓬萊乞歸丞相府連月書百回東郊治公姓笑渡濤江靄奉身信美矣體國安在哉帝家十二閑何嘗列駑駘遲子復立仗來歸勿徘徊

新編古今事類聚外集卷之四

南江 富大用 時可 編

金陵 唐富春 子和 刊

王府官部

總王府官附

傳 府尉 司馬

文學 記室叅軍

歷代沿革漢帝子為王王國置太傅相中尉各一人後每國置
郎中令一人晉諸王國大國有三卿左右常侍侍郎梁皇弟
皇子府置師長史司馬從事郎中諮議及掾屬錄事記室中
兵等叅軍及文學主簿功曹等負嗣王府蕃王府則減後齊
王位列大司馬上置師一人餘官大抵與梁不異隋親王置

師友各一人文學二人長史司馬諮議參軍掾屬各一人主簿二人餘事功曹記室等各一人唐親王府傳一人諮議參軍及長史司馬掾屬主簿錄事諸曹各一人文學記室典籤各二人宋王府師傅係以兼官爲之而無定員又有翊善直講贊讀記室及諸王宮大小教授等官元止置傳府尉司馬文學記室參軍

傳 漢高祖初置諸侯王有大傅輔導王魏晉因之宋齊梁陳皆爲師後魏諸蕃王各有師傅北齊唯置師隋皇叔昆弟皇子爲親王者置師唐因之開元改爲傅五代後唐長興四年以秘書監劉贊爲之宋有其官而無定員正三品元傅正四品掌師範輔導參議可否

府尉 諸王國有王尉魏晉宋齊梁陳北齊並有中尉隋因爲尉唐因之置二人正九品下掌分判國司事宋無其官元置府尉從五品掌警嚴侍從檢校門禁總統府中事

司馬 司馬主兵官宋齊諸王領鎮者各置一人梁陳後魏北齊並與長史同置唐因之置一人從四品下掌統理府寮紀綱職務宋有其官名而無定員元司馬從六品掌同府尉之事

文學 漢公府州郡並有文學魏諸王始有文學員晉宋齊梁陳皆因之班第五從七品後魏六品上北齊因之隋唐親王府置二人從六品上掌讎校典籍侍從文章宋置元復舊制從七品

記室參軍

漢三公及大將軍皆有記室令史主上章表奏板書
記魏太祖輔漢以陳琳阮瑀管記室軍國書檄名二
人所作晉諸公及位從公已上並置宋諸公府置梁
陳公府及王府皆置北齊因之隋唐親王嗣王府置
掌表啓書疏宋太平興國中置政和中以參軍行軍
之際所稱詔除參軍字元復舊名正八品

古今事實

有召必至 以下係傳

皇太子縑求乞自退封東海王故重選官屬以杜林為傳從駕
南巡狩時諸王傳數被引命或多交遊不得應詔惟林守慎有
召必至特受賞賜又辭不受帝益重之 後漢

盡忠輒諫

吳儀字子羽南魯二宮初立儀以本職領魯王傳儀嫌上宮相
近乃上疏以魯王蕪資文武為國藩輔二宮宜有降殺正上下
之序明教化之本書三四上為傳盡忠動輒規諫 吳主

擇贊自傳

趙贊為秦王傳秦王從禁握兵而驕言者請置師傅以傳之大
臣畏王請王自擇秦王即請贊拜秘書監為秦王傳贊泣曰禍
將至矣 五代史

知儀必儉

吳儀為魯王權傳盡忠規諫事上勤與人恭不治產業不受施
惠為屋舍才足自容鄰家有起大宅者權出望見問大室者誰

事類彙編卷之四
三
後漢書

左右對曰似吳儀家權曰儀儉必非也問果他家吳志

治官廉節以下係府尉

孔申公弟子為博士十餘人孔安國至臨淮太守徐偃為膠西

中尉其治官皆有廉節稱其好學史記

論語同異

淮陽王宣帝愛子器異其子欲以嗣王恃寵自驕乃用韋玄成

為中尉以輔導之受詔與蕭望之等論五經同異於石渠閣三

輔決錄

號將軍

梁孝王招延四方豪傑齊人公孫詭多奇計初見日賜金官至

中尉號公孫將軍前漢

思中尉

劭弘字德裕時景帝為琅琊王請弘為中尉弘體素方嚴儀度

甚偉雖私門接對悉委身隨使者潛至舍令使者進曰王有令

弘徐理鬢冠履俯伏盡禮然後讀之王與使者羣立瞻聽歎曰

古人稱不愧于屋漏其邵中尉乎吾乃逆詐以試長者豈不陋

哉王虚心受納忻宴言語晝夜無休弘乃上書諫王書讀三四

瞿然失色後謂左右曰思邵中尉之言使人于今毛豎前後

母為王吏

王吉為昌邑中尉以數諫王得減死髡戒子孫母為王國吏

方外司馬以下係司馬

後魏王晞為常山王司馬在并州雖戎馬填間未嘗以世務為

事類彙編卷之四
德書

累良辰美景嘯詠遨遊登山臨水以談燕為事士人謂之方外司馬北史

驢府司驢

謝超宗為黃門郎以失儀出為南郡王中軍司馬人問曰承有朝命定是何府超宗怨望答曰不知是司馬為是司驢既驢府正應為司驢有司奏以怨望免禁錮十年南史

諫王不法

蘇良嗣高宗時為周王府司馬王年少不法良嗣數諫甚見尊憚

吾子賴卿

劉焯之拜相王府司馬帝謂曰卿家忠孝吾子賴卿師矩冀遂在麻不扶而挺也

善詩賦

以下係文學

晉諸公贊扶風王年八十聰明善詩賦中表奇之魏烈祖以為齊芳王文學

善辭藻

竟陵王子良開西邸招文學牛僧孺虞義丘國賓蕭文琰丘令楷江洪劉孝孫並以善辭藻游焉

不取貴遊

齊衡陽王好學善屬文武帝謂王儉曰衡陽王須文學當使華實相稱不得止取貴遊子弟而已乃以太子舍人蕭敷為文學南史

精選賓友

晉鄭表魏武帝初封諸子為侯精選賓友表與徐幹俱為臨菑文學

察王舉措

山中恭王衮每讀書文學左右常恐以精力為病數諫止之然性所樂不能廢也文學方輔相與言曰受詔察王舉措有過當奏及有善亦宜以聞不可匿其美也遂共表稱陳衮美公聞之大驚責讓文學曰修身自守常人之行耳而諸君乃以上聞適增其負累也魏志

作富貴箴 以下係記室軍

孫覺傳字莘老遷昌王府記室叅軍王禮之間終身之戒覺為

陳諸侯之孝作富貴箴

陳進退節

神宗封淮陽王穎王韓維皆為記室叅軍王每事咨訪維悉心以對至拜起進退趨揖之容皆陳其節四朝國史

專掌文疏

東海王越以孫惠為記室叅軍專掌文疏每造書檄越嘗驛馬催之應命立成吳志

面叱巧令

竇侂為晉府記室賈琰為判官每諸王宗室宴集琰怡声下氣褒讚捷給侂叱曰賈氏子何巧言令色之甚獨不惧于心邪楊文公談苑

不可得而親疏

薛元敬薛收及族兄德音齊名世稱河東三鳳收為長雛德音
鶯鶯元敬年最少為鷓雛武德中為記室元敬謹畏未嘗申款
曲於房社如晦歎曰小記室不可得而親不可得而疏

不可有功名心

韓維字持國神宗初就外傳以維為王府記室神宗嘗與維論
天下事語及功名維曰人之功名因事始見人不可有功名心
神宗稱善 國史

新編古今事文類聚外集卷之四 終

新編古今事文類聚外集卷之五

南江	富大用	時可	編
金陵	唐富春	子和	刊

節使部

節度使

歷代公董古方伯連帥之職 後漢 劉虞為幽州牧就拜大司馬
公孫瓚討烏桓詔令授虞節度 晉 伐吳詔王守受杜預王渾
節度 唐 自武德至天寶以前邊防之制其軍城鎮守捉皆有
士而道有大將一人曰大總管已而又曰大都督至太宗時
行軍征討曰大總管在其本道曰大都督自高宗永徽以後

都督帶仕持節者謂之節度使然猶未以名官景雲二年以賀拔延似充河西節度使自此以後接乎開元天寶之間朔方隴右河東河西諸鎮皆置節度使緣邊之地凡八節度外任之重無比焉至德以後天下用兵中原刺史亦循其例受節度之別若諸州在節度使內者皆節度焉宋節度使並兼管内官察處置等使以本州刺史長史為節度官察等使不臨本部者以它官知判州府事防禦團練使刺史不赴本任亦如之故事節度使不帶使相位在卿監下至乾德五年升節度使班在龍墀內金吾將軍上無定員恩數與執政同初除鎖院降麻禮尤異焉祖宗以待宗室近屬外戚國壻年勞久次若外任除殿帥始授此官亦止一員或有功勳顯著任

帥守於外及前宰執拜者不輕受政和以後宦官秉旄鉞者蓋八員戚里以濫恩破格橫選者亦時有之政和二年詔節度使以下更不帶持節字只稱某軍節度使元祐官品令節度使從三品元節度使正四品

羣書要語元戎十乘詩總元帥之任殿天子之邦六帖節制諸

侯糾繩列郡 重鎮雄藩 分麾授律 見牙大任 分闔重

寄 轅門幕府 將星人傑 鎮撫方城 藩屏邦國 外威

夷狄 內撫黎元 作捍方隅 以將王室 有國柱石 予

王瓜牙 旌旗重寄 河洛要冲 蘊佐命之才有今邦之任

偶唐虞之代立方邵之勳並同上幢牙茸毒金巾柝羽旆旌

旗柳宗元集 寵任麾鉞楊炎志 入叅廟筭出總帥干李受志

授鉞開府殿我南邦

白集

設壇而拜授鉞而征持衛義之印即

拜軍中授岑彭之節行於闡外

元集

初司戎鉞

文集限守戎律

同上統節制之師貞否臧之律撫其四封率彼五長

常集除節

度志

旌惟進善節以詰奸

同上

為王瓜牙為國藩垣

韓愈上邢

君牙書

擁節總戎率身和衆

劉禹錫集

豹尾神旌彙兜戟毒

文龍旂四牡鈞膺鏤錫命服有煒先君再揚

除集節度使碑壽

甲瑀戈涇師以往車旟驚尾涇俗以寧

涇原節度劉昌碑時昌

為南邪王檢校僕射

鉄或瑀戈乃主夏盟山玄朱組以靖蜀京

李國貞碑

再麾飄飄而出守十乘隱麟以啓行

常集

龍節蜺旌

降於天上鸞書翠輶錫在掌中

同上

帥鉞將旄非功弗授

紅旆將軍昨日歸

白居易注

藩鎮例駐紅旆

詔出未央宮

登壇近總戎上公周太保副相漢司空弓抱關西月旂翻渭北
風岑參送李太保充渭北節度

古今事實

賜之旌節

唐節度使掌總軍旅顯誅殺初授具帑秣兵仗詣兵部辭見觀
察使亦如之辭日賜雙旌雙節行則建節樹六纛中官祖送次
一驛輒上聞唐百官志天寶中緣邊禦戎之地置八節度使受
命之日賜之旌節謂之節度使得以專制軍事行則見節柱六
纛外任之重無比焉職官分紀

賜以樽勺

牛僧孺字思黯為山東道節度賜葵樽龍勺詔曰精金古器以

三才身夕集 卷之五 三 德壽堂

比况君子

親王遙領

開元中剡王除安北大都護充安撫河東關內隴右諸藩部落
大使親王遙領節度自此始

宰相遙領

開元十四年河西節度副大使知節度使蕭嵩除同中書門下
平章事節度如故宰相遙領節度自此始

父子更九鎮

唐柳仲郢父子更九鎮

同日踐兩鎮

李愬字元真帝方經畧隴右徙愬節度鳳翔李師道反詔愬武

寧同日踐父兄兩鎮世以為榮

六遷大鎮

李晟克復市不易肆及愬平淮蔡復踵其美父子仍建大勳兄
弟籍父勳烈率以第宅相高惟愬六遷大鎮所處先人舊宅而

已耳

四佩將印

正中似為河西隴右節度使權朔方河東節度佩四將印勁兵
重地控制萬里近世未有也

烏集蔡戟

柳仲郢為太平軍節度使自拜諫議後每遷官羣烏大集於昇
平里第庭柱蔡戟架皆滿凡五日而散詔下家人以為候除太

平鳥不集

持節就第

自至德後方鎮降拜必遣內使持幢節就第

唐職林

入境築樓

唐節度使入境州縣築節樓迎以鼓角衙仗居前旌幢居中太將鳴珂金鈿鼓角居後州縣齋印迎于道左從事三日洗印視其利闕歲以八月考其治否銷兵為上考足食為中考邊功為下考

臥護北門

裴度為河東節度帝命盧弘宣諭曰為朕臥護北門可也

堪當闔寄

唐玄宗求良將委以河東河北之事問郭子儀子儀薦李光弼堪當闔寄

賞罰分明

封常清北庭都護持節伊西節度常清性勤儉耐勞苦出軍乘騾私廐裁二馬賞罰分明

威令簡肅

李愿元和初為銀州等節度使威令簡肅甚得綏懷之術政更寬恕

王周歷貝州涇州節度使涇州張彥澤為政苛虐民多流亡周乃更寬恕問民疾苦去苛弊二十餘事民皆復歸歷四鎮皆有善政

政代寬簡

張洪靜徙節宣武承韓洪虐政代寬簡民便安之

秋毫無犯

郭子儀李晟為節度使收長安秋毫無所犯

令嚴無犯

令狐彰拜滑亳魏博節度使當寇冲城邑壘漆彰躬訓吏下檢軍力之法令嚴無敢犯者田疇大闢庫交豐餘年時貢賦如期

頗有治名

薛嵩相為邢洛等州節度使方大亂後人亦厭禍嵩謹奉職頗有治名

更除繆政

安潛代高駢領西川節度使倚駢為奸利者潛誅之數年更除繆政

公退端居

段秀實拜涇原鄭頴節度使三四年間吐蕃不敢犯塞清約率易遠近稱之非公會不聽樂飲酒私室無妓女無贏財公退之後端居靖慮而已

戎服待見

柳公綽使山南時牛僧孺罷相入江夏公綽具戎服於郵舍待之軍吏以漢上地高於鄂禮太過公綽曰奇章才離台席方鎮重宰相是尊朝廷也竟以戎容見之

為治嚴稜

事文類聚下集 卷之五 六 德壽亭記

裴玠授同州節度元和三年徙山南東道玠為治嚴稜畏遠權勢不務貢奉蔬食敝衣居處取庇風雨而已倉庫充實百姓之安

未嘗贍索

徐申進嶺南節度使外蕃歲以珠璣瑁香天犀浮海至申於常貢外未嘗贍索商賈饒盈

信懷義成

袁滋徙義成節度使滑用武地東臨淄北魏博滋嚴作而推誠信務在懷來李師道田季安畏服之居七年百姓立祠祀祭

威震兩河

却士美討王承宗為大將王獻督萬人為前鋒獻恣橫士美斬以狗下鼓之大破賊憲宗曰固知士美能辦吾事承宗大震懼

合諸班師威震兩河

斬折七軍

高崇文元和初為右神策行營節度使統諸鎮討西川劉闢至興元軍中有失旅店之七著者斬以狗初闢擒東川節度使李康及崇文克棣州而歸康求雪已罪崇文以康戰軍失守斬之

誅舞文吏

柳公綽為山南東道節度使行部至鄧縣有二吏犯法一贓賄一舞文縣令以公綽守法必殺贓吏獄具公綽判之曰贓吏犯法法在奸吏壞法法亡誅舞文者

斬朱泚使

韋臯為營田判官權知隴州留後事朱泚既僭遂令家僮使于

韋臯為營田判官權知隴州留後事朱泚既僭遂令家僮使于

臯又遣劉洵賓授臯鳳翔節度使臯俱斬以徇於是進臯為御
史大夫隴州刺史置奉其軍節度使以旌之

行守珪令

張九齡為相范陽節度使張守珪以裨將安祿山討奚契丹大
敗執送京師請行朝典九齡奏曰守珪軍令而行祿山不以克
歿

許民它遷

張延賞為淮南節度歲旱民它遷吏禁之延賞曰抱此而斃不
如適彼以生乃具舟遣之勅吏為修室廬已逋債而歸者更增
於舊瓜步舟車津湊而遙擊江南延賞請度屬揚州自是行無
稽滯

禁俗不葬

李暠檢校太原以北諸軍節度使太原俗為浮屠法死不葬以
尸投山谷飼鳥獸號其地曰黃坑有狗數百頭習食髑頤為人
患吏不敢禁暠至遣捕羣狗殺之申厲禁條遂革其風

西道遂捕

李臯遷荆南節度使凡戰大小三十二取州五縣二十斬首三
萬三千生擒萬六千未嘗敗師所過不敢伐桑棗踐禾稼朝廷
仰食江淮而淮西道出九江至大別皆與賊接臯轉戰數千里
餉路遂通江漢倚臯為固

南裔肅然

李復轉嶺南節度使時安南經略使高平正張應繼卒其佐李

元度胡懷義等阻兵脅州縣肆為奸賊復至誘懷義杖歿流元度南裔肅然教民作陶瓦鑄諭蠻獠收瓊州致都督府

自擇留後

杜牧追咎長慶以來朝廷措置亡術復失山東鉅封劇鎮地大者連州十餘小者猶兼三四故兵驕則逐帥帥強則叛上或父歿子握兵而不肯代取捨由於士卒往往自擇將吏號為留後以邀命于朝天子力不能制因而撫之謂之姑息之政姑息愈甚而兵將愈驕由是號令自出以相侵擊

唐志兵

號為債帥

唐武忠節度王沛歿宰相裴度韋處厚以高瑀領忠武節度自大曆後擇帥悉出管軍中尉所輸貸者假貸富人後得所欲則推簡斲膏倍以酬息十償六七及瑀有命士夫相告曰韋裴作相天下無債帥

降麻非故事

唐制節度使除僕射尚書侍郎者謂之納節皆不降麻止舍人院草制宋天禧中丁謂自保信軍節度使除吏部尚書叅知政事先公在西閣草制政和中韓公自武康軍節度使除工部尚書三司使降麻非故事也

春明退朝

節度有三印

宋祥符中上覽河南節度使知許州石普奏狀用許州觀察印以問宰相王旦曰節度軍州有三印兵仗則節度判官掌書記推官署狀用節度印印之舊職則觀察判官署狀用觀察印印

之符制屬縣則大使判署用州印印之 同上

三世節使

宋朝三世節度使一家吳琳子挺孫曦

四世節使

四世為節度使二家錢忱高祖倂曾祖惟演父景臻鄭藻大父紳父成之子與裔

五世節度

五世為節度使一家韓侂胄曾祖忠獻從子邈從孫同卿曾 孫

父子建節

父子建節十三家劉光世父延慶錢忱父景臻邢煥子孝楊韋淵子謙吳珍子拱吳璘子挺郭浩孫杲楊存中子俊劉錡父武

仲吳益子琚琨吳蓋子瓌吳挺子曦

兄弟建節

兄弟建節七家吳玠弟璘錢忱弟恂韋謙弟謹吳益弟蓋吳拱弟挺吳琚弟瑒李孝友弟孝純

古今文集

雜著

代郭子儀謝副元帥河中節度使表 邵說

寄深匡輔任切安危寵命遄臨憂惶如灼 臣 其中謝 臣 智術凡淺才略無聞承日月之光遇風雲之會自奉先帝狗以馳驅被甲即戎載惟寒暑比憑朝美克振天聲雖毫髮之功曾無足紀竟不能掃蕩妖孽使八方攸同謬踐中樞仍叨上將分茅錫社

榮貫一時悽悽之誠切自增愧今又猥蒙驅策出鎮河中授臣以連帥之權委臣以專征之務雖才輕方召而任比栢文此陛下除奸之時乃微臣死難之日切見自古忠義之士莫不扶危救禍憂國忘家雖在暮年猶思報主則廉頗強飯馬援據鞍以臣方之有甚前哲軍國事重不敢固辭誓竭股肱之力以副腹心之寄儻皇猷獲展寇難克平殞身成行實無所恨無任感恩

代郭子儀辭河東節度使表

邵說

祇拜休命內揣薄才委任專崇周章失據臣其中謝臣聞邊之安危係於所用事之成敗諒在先謀故寸壁必求良工尺金亦資善製况夫謀無智勇備列戎旃自守封疆頗淹歲序肅將朝美翦滅兇徒此乃天功匪惟臣力陛下不遺犬馬念以驅馳收

其分寸之勞加以丘山之賞禮因位重恩與日深常恐顛危不克負荷所以非有陳讓乞停范陽而手詔曲垂不蒙允許退就私室切愧明時素餐之詩自臣攸作今又更承獎命兼以河東邊境相連三千餘里烽燧列警斥候須明雖則居安終資有備以臣獨制謂必無失然以能處一事身任一官猶擇其人且愧曠職况臣旁縮三節控帶數藩智有所不周心有所不及兵權倘失奔駟寧追實慮授受乖宜簡書是畏特望矜臣不逮察臣愚諛更選良能付以旄鉞則樵夫絕議官序有倫

謝浙西節度使表

顏真卿

聖德含弘不遺簪履捨其罪戾假以麾幢感戴恩榮歿生知報臣其中謝臣以為全吳舊國分闡重權煮東海以自資塹西河

而作固九州天險之地六代帝王之都是以魏文興嗟其從南
北之限符堅恃衆爰喪百萬之師豈不以形勝是先腹心斯切
親賢重寄鎮遏攸難矧在庸微寧堪及此是以拜命之日以榮
為憂制書以今月四日至饒州臣以今日發赴本道取都統節
度觀察使李峘處分訖即赴昇州即當繕修甲兵撫循將士觀
察要害以備不虞假陛下英武之威守陛下聖明之理一心戮
力上蒼天慈伏惟陛下察臣愚衷則歿且不朽無任感戴屏營
之至

代辭節度使表

汪藻

誤恩隆洽久蒙曠責之譏小已兢慚敢緩辭榮之請具輸愚懇
仰冒隆威中謝伏念臣早濫褒揚侵階華近雖孤忠圖報誓糜
殞以為期然晚節知非悟滿盈之可戒昨待言於帷幄祈休迹
於田廬甫解煩機遽頒異數以章句小儒而竊授方之寵以斗
升素志而叨制祿之優方渙號之已行固牢辭而莫獲坐貪名
器荐歷歲時若猶冒昧以自如將至顛隳而靡悔伏望皇帝陛
下特垂公聽俯諒忱辭鑄築壇節制之名守留輪允厘之任豈
獨少安于分願固將無累於恩私既聖度曲全許保益謙之終
吉况天威未遠敢忘歸美之餘忠

代薛門下辭免節度使表

汪藻

引疾辭榮方幸機衡之解疏恩越等乃蒙旌節之頒寧如淵谷
之臨莫測雲天之施輒布由衷之懇仰干方命之誅伏念臣承
學闕如起家寒甚早被聖神之遇遂參丞弼之司黽勉十年周

旋三省妨賢最久自知罪戾之盈容跡每安實賴恩矜之至比
失衛生之理益懷誤國之憂力丐投閑僅蒙賜可所願退安於
散秩敢圖併受於隆名惟齋鉞臨師本人主待有功之士而祠
廷置使亦朝家優元老之臣顧平時猶懼于素殮豈病質乃堪
於微使伏望皇帝陛下不忘舊物深諒微忠量才能小大之宜
盡庇覆始終之意特回渙號靡速頓言未泯餘生尚可筋骸之
強誓堅晚節仰酬體貌之優

真定府總管謝上表

張太傅

河朔雄藩戎昭重柄猥承選用俯愧踈愚蒞事方初撫躬增惧
中謝伏念臣素無器業孤奉明恩自塵換秩之勞荐被董戎之
寄西人外鎮累分經討之權比虜近邊卽投撫綏之任曾微績
效但掇僭尤顧擯矣以誠其居冗散而爲戒敢冀皇明下燭寒
灰復然召從江海之濱再立軒墀之下仍分戎柄兼處兵衝臣
昨入侍禁廷及赴卑職將辭黼座親奉玉音怜其驅策辛勤察
其遷徙煩併許令今任且俾安居雖均勞逸之宜實被丁寧之
誨此蓋伏遇皇帝陛下熙隆寶運維御羣才特推求舊之恩得
展自新之效矧又不兼它局專治兵家惟紀律之素嚴寔詔條
而慎守謹當愈堅成節曲盡訓齊無事之秋使營而知勸臨敵
之際則授命以忘身冀竭愚忠上酬恩造

河西節度使廳壁記

楊炎

皇帝肇建節制之任位以上將主四方之兵濟河而西五侯四
將十有六縣大海磅礴乎終始山河迴流其左右旄頭虎力之

勁劔服穹廬之長煌煌乎長車千乘橫合萬里皆主乎是邦故
秦已上爲戎都漢已下爲巨防有城府襟帶焉有良將大勳焉
有五都污雜焉其風悍其國險鮮車龍服囂然相蕩非古之戰
守曷以成其業而樹其風者哉昔在武德之初上用雄武大才
則我隴西李王肅明乎神化大冢宰宇文公駙馬喬公出將我
前軍中興之後循吏繼作則館陶侯郭公鷄鳩氏司馬公相國
韋公蕭公庶績交修以被昇平之化當今王室多故雲海沸騰
則僕射哥舒公以縱橫之奇判總軍國其意者將復用雄武大
才乎君子曰武德之官神以略其化成中興之政儉以行其
俗阜當今之理動以合而人安宜乎盡天下之才隨質文之變
以求來裔大康乎斯時天寶十二年夏六月記

邠州節度使廳記

鄭處晦

邠爲古國其俗質而厚其人朴而易理業尚播種畜擾有后稷
公劉之遺風始皇并天下地屬喬輔後漢析爲新平郡後魏改
置豳州國朝因之開元中詔以幽幽爲疑因改爲邠天寶已前
太平歲久西通伊涼萬里而遠邠實爲近郡申王薛王以親賢
之貴居之太尉房公以盛德之重居之洎逆胡勃起幽朔西戎
塵全湯湧乘艱難際盜據河右蕃兵去王城不及五百里兵由
是爲邊郡斥候近郊鎮要害大曆中尚父汾陽王始以朔方軍
壯其威容後益選武勇驍健有膽決奇謀者繼之今天子三年
西戎款關獻河湟數州故地西鄙益託邠爲近藩上念兵戎方
息邊備愈遠始詔司空白公由丞相府持節來鎮丞相功成繼

命文雅忠恕之風煦然而起邊人若寢寤拭目心意蘇醒始知禮讓文化之爲急務廷議以我季父尚書公前爲夏帥夷毗又安寇盜弭息儲廩果實器械果完懋賞休績遷鎮是軍季父又以理夏之政移之於邠邠人嬉嬉薰爲太和嘗觀屋壁志前帥是軍者之名氏因曰曩之帥此者豈不知是邠始務公車而角材堅壘未暇及此爾吾旣承數君子大理之後敢不勤督吾之未至者况今戎醜旣夷不宜獨以鳴鼓聳教擊刺爲事因命疏自開元已來刺是郡帥是軍者追書于屋壁季父尚書公曰吾思將有以警于吾前警于吾後者邠之士實婦人無桑績不能自衣朔方之軍雄男子勇于公戰無他業以自厚故郡之人以耕稼爲事軍之卒以勇敢得賞後之撫于人者宜勉農畝時其徵調人不擾而完富夫帥于軍者宜嚴其刑賞時其衣食卒不驕而勇敢夫人旣完富卒旣勇敢生聚之訓練之吾知青海之西不數年爲內郡夫命處晦記其終始序于前後處晦謹以季父之言志于後將永於後之人俾無怠大中二年三月日記

邠州節度使院記

李直方

自西漢始置幕府得顯辟士其聘舉之盛與公府置吏王國命官爲比於是班固傳教崔駰蔡邕陳琳阮瑀之徒出焉大抵多巡禦封略經參戎事居無恒處秩靡常品故命之曰賓國朝篤方岳之任慎求其佐頒以職貢爲之定制或辟自諸侯或降于朝廷皆命于天子其所司也調政教之和策軍筭之秘出入聘覲應對賓客其立署也行有戎次處有公堂與方伯周旋彌

縫潤色而已王畿之腋劃為巨防外殿朝那作捍西羗中拱皇
 都以臨諸夏漆沮之仁既遠華夷之俗相猾非瓌材英傑莫典
 封守非莊明純固莫參毗佐六年春皇帝勞韓侯牧圉之覲俾
 尹西夏申命御史中丞王君等九人為之使介既而師貞于律
 農勤其功惠和威武澤浸火烈孟秋述職曜兵河塞亭障蕭條
 千里晏清然後用虎旗蛇矛定功于蒲入覲皇都增秩受賜旋
 師舊服勲明德舉非元臣雄略能賢嘉績茂用濟此先是尚父
 郭公開府是邦搜賢勿二俊又咸集不十數年持樞衡治邦憲
 司誥命者咸布職於清朝今韓侯亦能詳延端士輔相威德則
 是府將來宜為駿賢之郊敷榮達之閫闔衛多君子邠其有之
 夫敬其事則命始春秋之誼也是邦當徵號朔方而以名師建

為三郡肇基於我書事舉德宜始韓侯此記舊題於堂之北墉
 慮它日文字湮滅作者之文莫傳遂刻石以紀之李公自正字
 歷金吾掾廷評長安主簿遷監察殿中侍御史左司員外郎今
 為韶州刺史某早與公遊知公異時之大來也庶斯文之不泯
 貞元二十年十月日記

鎮海軍使

羅隱

惟天子建國必維九牧九牧既序區分局署兩漢三公府有掾
 屬魏晉而降則置行臺若魏以秦王儀鎮中都高齊以辛術監
 治東徐州事皆行臺之任也其官屬則令僕以至於尚書丞郎
 唐制由行臺而置采訪使殆今節制之始也鎮海軍舊治京口
 大丞相以錢塘之衆椹漢宏西殲逆朗天子不欲易其士故自

符竹四命然後移軍於錢塘生以物宜租賦以便斥去舊址廣以新規廊開閤拔起階級俾幢節之氣色貌武之出入得以周旋焉庚申年始闢大廳之西南以為賓從宴息之所左界飛樓右劇嚴城地聳勢峻約而有敞肥楹巨棟間架相稱雕煥之下朱紫冉冉非若越之今而潤之舊也疆場之事則議之於斯聘好之禮則接之於斯生民之疾痛則啓之於斯軍旅賞罰則參之於斯非徒以酒食駢羅而語言嘲謔者也其府屬以下或入都舊將或從公于征或稟之於朝廷或拔之於鄉里故天子用青宮傳道之選以佐之輟教民論道之任以副之其餘省秩卿曹職領相次自我朝藩服官屬之盛無加也噫大丞相之勲德既藏之天府而攀鱗附翼者非鐫刻樂石其可久乎是年公

十月始命觀察判官羅隱記

防禦使

歷代沿革 武后聖曆元年以夏州領防禦使防禦使之名自此始開元二年薛訥為隴右防禦使天寶中安祿山犯順太郡要地當賊冲者置防禦守捉使代宗授田承嗣魏博等州都防禦使大率防禦隸所治州歲以八月考其治否以無虞為上考清苦為中考政戒為下考 **宋** **唐** 制置諸州防禦使 **元** 置諸路防禦使掌防制盜賊事

羣書要語 朕之腹心 唐代宗永太制 兵防之任 同上 宜進厥位以稱禦侮之實 荆公除皇姪制 禦侮之寄 曲阜除曲珍制 列位

軍防

洪水除皇角克思制

正名關禦之任

樂城除曹評制

爰思

并防之秩

龍溪制

升軍禦之任增使節之華

除文恭行李希及制

古今事實

虜不能犯

薛可言少帝即位遷瀘州防禦使時虜寇魏博遊騎晨夕至河上可言備豫有素虜不能犯

民皆便之

五代世宗時李王為安州防禦使治郡寬簡民皆便之吏民數百人詣監軍馮守規請立碑頌德詔中書舍人富儀撰文賜之州人立碑

郭玉世宗時為齊州防禦使歲不登以俸鈔分施饑民自墜見

來者亦均給之人懷其惠相率詣闕頌其德政立碑

郡人立碑

宋李漢超為齊州防禦使郡人愛之求為立德政碑太祖詔徐鉉撰文賜之

邊夷畫像

楊旼字延昭為防禦使屢有邊功天下稱為楊無敵夷虜皆畫其像而事之云以禦鬼疾

新編古今事文類聚外集卷之五

新編古今事文類聚外集

卷之五

德壽堂

其野而事之云以野與

謝如字或即為初與對夏首豈世天下蘇蘇財無新夷實濟

忠夷清

陸謝文與云

新編古今事文類聚外集卷之六

南江 富大用 時可 編

金陵 唐富春 子和 刊

統軍司部

都元帥 附副元帥

歷代沿革元帥舊無其名左傳晉作三軍謀元帥雖有元帥之稱而非官名後周大象元年詔以上柱國為行軍元帥以親王為之凡親王總戎曰元帥文武官總統則曰總管高祖定京師置左右元帥太原道行軍元帥西討元帥天寶末置天下兵馬元帥皆以親王領之又以大臣為副元帥大曆

八年罷天下兵馬元帥建中四年以李希烈反置諸軍行營
 兵馬都元帥會昌中置靈夏六道元帥天復二年置諸道兵
 馬元帥尋復改曰天下兵馬元帥五代長興間加為天下兵
 馬大元帥錢俶在漢朝為東南面兵馬都元帥宋建隆元年
 加錢俶為天下兵馬大元帥元立都元帥府掌征討之事有
 都元帥左右二副元帥左右二監軍又有檢法等員

羣書要語方叔元老克壯其猷

詩

晉作三軍謀元帥

左傳

古今事實

詩書元帥

晉作三軍謀元帥趙衰曰卻縠可臣亟聞其言矣說禮樂而敦
 詩書詩書義之府也禮樂德之則也德義利之本也

節度元勳

唐詔郭子儀李光弼等九節度之師討安慶緒帝以子儀光弼
 俱是元勳難相統屬故不立元帥

征討元帥

唐榮士琬為征討元帥高仙芝為副琬素雅稱風格秀整時士
 庶咸服焉

撫軍元帥

唐寧王琰英毅有才略善騎射每血戰在前時玄宗幸蜀留肅
 宗討賊至靈武肅宗即位欲以廣平王為元子以琰為其馬元
 帥左右曰廣平今未冊立艱難時人猶屬望于元帥况太子從
 日撫軍守曰監國今之元帥撫軍也廣平為宜遂以廣平為元帥

玉冊金印

同光中以錢鏐為天下兵馬都元帥尚父尚書令封吳越國王賜玉冊金印

手詔勅書

唐代宗即位內官程元振忌嫉宿將郭子儀巧行離間請罷副元帥子儀既謝恩上表進肅宗所賜前後詔勅因自陳訴曰陛下曲垂惠獎念及勤勞貽臣詔書一千餘首聖旨微婉慰諭綢繆彰微臣一時之功誠子孫萬代之寶自靈武河北河南彭原鄜紆河東鳳翔兩京絳州臣所經行賜手詔勅書凡二十卷昧死上進庶煩聽覽詔答曰朕不德不明俾大臣疑朕之過也

臨軒授鉞

德宗幸山南以渾瑊充朔方邠寧振武等道兼永平軍奉天行營兵馬副元帥上臨軒授鉞用漢拜韓信故事

上樓行禮

唐郭子儀自涇陽入朝帝御安福門待之命子儀樓上行朝見之禮宴賜隆厚

圖凌烟閣

唐德宗初為天下兵馬元帥封魯王時史朝義據東都代宗遣德宗會諸軍大舉破賊于洛陽朝義走河北分命諸將追之俄而賊將斬朝義首以獻河北平以元帥功拜郭子儀等八人圖形于凌烟閣

創凌烟閣

昭宗末年中書奏西京舊有凌烟閣圖畫功臣今遷都洛陽合議脩建副元帥梁王勳庸冠世仍請凌烟閣側別創一閣以表殊勲從之

陳人退走

後周韋孝寬至淮南所在皆密送誠款謂五門尤為險要陳人若開塘放水即津濟路絕孝寬遽守之陳刺史吳文立果遣決堰已無及於是陳人退走江北悉平

公拓授首

唐輔公拓據江東反命河間王孝恭為行軍元帥擊之將發宴諸將取水忽化為血在坐失色孝恭飲之曰此公拓授首之徵也眾服其識度後果擒公拓

有功遙統

開元十八年奚契丹犯塞肅宗時為忠王乃授河北道元帥信王偉為副帥御史大夫李朝隱等八總管兵討之及諸將大破奚契丹肅宗以遙統之功加司徒

竟不臨戎

隋開皇十八年以漢王諒為行軍元帥水陸三十萬伐高麗諒至遼水師遇疾疫不利而還十九年突厥犯塞又以諒為行軍元帥竟不臨戎

清河江神

隋楊素為行軍元帥伐陳素率水軍東下舟艦蔽江旌甲耀日素坐平乘大船容貌雄偉陳人望之曰清河公即江神也

兩浙尚父

唐詔曰朝廷每有將相思命准往例列銜於勅牒後側書使字今兩浙節度使錢鏐是元帥尚父與使相名殊不合列署勅尾今後每署將相勅牒宜落下官位仍永為式

詔置寮屬

吳越正明三年詔授錢鏐諸道兵馬元帥四年置元帥府寮屬遣將誓師

錢弘佐開運三年詔授東南兵馬都元帥李孺贊之求救也諸將皆不欲行弘佐因召文武官集議果言山水險惡不可興兵弘佐變色曰唇亡齒寒古之明戒吾為天下元帥豈不能恤憐若有異議者斬眾皆攝伏乃遣將誓師辭令明肅果有成功

監軍

歷代沿革 史記司馬穰苴請以寵臣為監軍 後漢光武使來歙監諸將 晉武帝以刺史為監軍 唐以宦者為監軍 五代後唐亦有太原監軍 都元帥府有元帥左右二監軍亦掌征討之事

古今事實

銳卒遊軍

司馬文王征壽春使監軍石苞簡銳卒為遊軍 魏志

褰帳撫帝

後唐張承業為太原監軍常從征討王師既退沐營大將周德

威慮其奔衝堅請退舍帝怒垂帳而寢諸將咸詣監軍請承業
遽至牙門褰帳而入撫帝曰此非安寢時周德威老將洞識兵
勢姑務萬全不可忽帝蹶然而興曰予方思之其夕遂收軍

代史

斬狗驕貴

齊司馬穰苴將兵扞燕晉之師苴曰臣素卑賤願得君之寵臣
國之所尊以監軍景公使莊賈往苴與賈約會日中於軍門苴
先馳至軍立表下漏賈素驕貴夕時乃至苴遂斬賈以徇三軍
士皆震慄服之

史記

懲踰法禁

張承業為太原監軍武皇屬以後事曰吾兒孤弱羣庶縱橫後
事公善籌之承業奉遺詔策畧居多莊宗感其意兄事之時諸
王之貴介弟在晉陽宮或不以其道承業悉不聽踰法禁者必
懲由是貴戚斂手

不與積錢

後唐莊宗時或有中傷監軍張承業於莊宗者言專美威柄廣
納賂遺莊宗歲時還晉陽宮省太后嘗置酒命典聖宮使繼笈
為承業起舞既罷承業出寶帶幣馬奉之莊宗指錢積謂承業
曰和歌繼笈字也無錢使七歌與此一積寶馬非殊惠也承業
謝曰郎君歌舞承業自出已俸錢此錢是大王庫物准擬支贍
三軍不敢以公物為私禮也

自劾矯詔

宋均為監軍時將軍馬援征漢南臨水軍士多病均懼衆疾疫
矯詔迫降之諸將莫應均力勒兵圍賊詐為詔而降之為置長
史而歸自劾矯詔之罪帝善之

止可委宮事

蕭復為相嘗言艱難以來始用宦者監軍權望太重是曹止可
委宮掖事兵要政機難使叅領帝不聽

不得干軍要

李德裕為相先是韓全義敗於蔡杜叔良敗於陳皆宦人監軍
制其權將不得專進退詔書一日三四下宰相不與又諸道銳
兵驃士皆監軍取以自隨每督戰乘高建旗自表小不勝輒出
旗去大兵隨以北由是王師所向多敗至討回鶻澤潞德裕奏

請詔書付宰司乃下監軍不得干軍要自是號令分明將乃有

功

口毀子儀

唐九節度圍賊相州以魚朝恩為觀軍容使郭子儀有定天下
之功居人臣第一朝恩心妬之乘相州敗醜為詆譖肅宗不納
其語然猶罷子儀兵軍京師代宗立與程元振一口加毀帝未
及寤子儀憂甚俄而吐蕃陷京師卒用其力王室再安朝恩內
慙

天奪子布

張承業為太原監軍帝初獲王璽諸將勸帝復唐正朔承業自
太原急趨謁帝從容言曰今元凶未殄軍賊不克願殿下受人

推戴悠悠之謀無益實事因泣下沾衿帝曰予非所願柰諸將何承業自是多病日加危篤卒於官凶問至帝悲慟連日輟食因言曰天奪孤之子布也

招討使

附副招討

歷代沿革唐貞元時置招討使自後隨用兵權置兵罷則停後以節度兼支度管田招討經畧使則有副使判官各一人**五代後唐**亦以招討使為都統之副**宋**因之**元**有招討使副招討

羣書要語前命相臣招懷撫矜而誑誤示以生門期於盡脫網羅豈欲驅之陷穽而豺狼當道荆棘牽衣雖欲歸之於仁厥路

無由而至

元稹裴度制

一劔橫車萬夫莫前陰則難窺勇則重

閑亞夫緩急之任繼父絳侯祭遵禦侮之才為吾子路

一品集

王宰制

古今事實

兼招討使

唐德宗初即位建中二年田悅圍邢州次臨洛詔河東節度使馬燧與昭義節度使李抱真神策將李晟合兵救臨洛悅兵大敗邢州圍亦解以功右僕射尋又加燧魏博招討使三年又敗悅於洹水詔加魏州大都督府長史兼魏博等四州節度觀察招討使

讓招討名

裴度受淮西宣慰招討處置使詔出度以韓弘為淮西行營都統不欲更為招討請祇稱宣慰處置使從之

賊鋒屢挫

來瑱為潁川郡太守充招討使肅宗以瑱武畧又加委任遷兼御史大夫比收河洛屢挫賊鋒頗來攻皆為瑱所敗賊等懼之號為來嚼鐵

籌畫皆出

五代後唐莊宗與郭崇韜謀討伐之計時明宗為諸道兵馬總管當行崇韜自以宦者相傾欲立大功以制之乃奏曰魏王繼及德望日崇大功未著宜依故事以親王為元帥莊宗曰小兒幼稚安能獨行卿當擇其副崇韜未奏莊宗曰無踰於卿乃以

繼及為都統崇韜為招討使率親軍六萬進討西川籌畫皆出崇韜繼及承命而已

曰龍圖公

范仲淹知慶州兼經畧招討使未幾賊兵三萬叩城仲淹麾兵戰賊奔北遂戒諸將無追奔既而果有伏兵又奪馬為大順城及築細腰胡蘆等寨招明珠滅滅二強族萬餘人及命環州种世衡招千餘人久之王師再喪於定川仲淹晝夜領兵為援初關輔人心動搖及見仲淹耀兵號令嚴明威震戎落人心遂安第相賀曰邊上自有龍圖公為長城吾屬何憂

慕郭代公

慶曆三年以鄭戩代仲淹為四路都招討置府於涇嘗慨然慕

郭代公功業元昊擁衆臨黑山戩勒兵巡邊抵鎮戎趨蓮花堡置酒高會旗幟絡野饒鼓喧天虜衆十萬相顧不敢動元昊謂其下曰我已遣使稱臣朝廷何爲復用此公其畏如此

都統領

歷代沿革 **晉** 孝武帝太元十九年有河西大都統 **唐** 天寶未置爲天下兵馬元帥都統朔方河南北平盧節度使都統之名始於此乾元元年戶部尚書李峘除都統淮南江東西節度使宣尉觀察處置等使都統之官始於此 **唐** 制或總五道或總三道上元未省大中後討徐州以康承訓討黃巢以荆王鐸爲都統黃巢之難置諸道行營都統掌征伐兵罷則省雖

總諸道兵馬不賜旌節 **宋** 諸軍都統制者自渡江已前亦有之然未嘗爲官稱蓋是時陝西河東三路皆以武臣職高有智者爲馬步軍副都總管遇出師征討則加以都統制軍馬之名非有司分也建炎元年置御營司遂擢王襄愍爲都統制都統制名官自此始大槩南渡置統制一則兵興稱謂不一諸路起兵有自稱統制者州縣管押勒王兵者亦有稱統制者諸道都總管及諸司便宜差統制者建炎初劉光世上言於是竝罷惟中都主兵朝廷差充統制者仍舊紹興十一年韓世忠張浚岳飛除樞密副使罷宣撫司其統制將副並改充御前隸樞密院各帶御前字入銜其兵馬就今所部統制官節制而都統皆以屯駐名冠軍額之上獨川陝如故嘉

定初蜀叛既平安觀文又奏分興州十軍為沔利三軍沔州除都統制利州除副都統天下有十都統矣是年兀朮犯泗州詔樞密使張俊於鎮江府置司措置江淮守備俊發張憲事併岳飛賜歿俊遂薦其將定遠軍節度使田師中掌故岳飛之兵又薦清遠軍節度使王德往金陵於是竝詔為御前都制師中於鄂州德於建康府駐劄其後大軍又有統制同統制副統制統領同統領副統領等其下乃有正將副將準備將之名皆偏裨也舊制準備而上自主帥陞差仍先申樞密院定察紹熙四年詔江上陞差統制至準備將今主帥解發三人赴總領所內選一名慶元三年詔陞差竝委主帥自是主帥之權復重矣元統軍司有統軍使統軍副使及都統

統領副統領知事之職

羣書要語元戎十乘以先啓行詩卻毅將上軍左傳長子帥師

楊梁弘御戎左傳戎帥楊朱克融詔節將李御公集宜兼領護

之權副師貞之吉李若園制執羈霸府盡忠肅之勤誠聳劔元

戎聲旄麾之茂績張延帥制折衝之寄符玉帳而總金壇同上

出總戎麾杜佑制分委戎輅作鎮孟津杜牧行李瑋冊授銅符

之律王縉制執戎鈴以涖衆杜黃裳制往持戎律陳敬壇制權

握兵戎討董昌制建牙統衆必籍雄才陸集劉洽制出統戎旃

宋廣平集詔來帥熊羆四方作儀翰父為戎臣師同上分命督

將保寧疆境開元戎勵州牧將詔

詩句弓箭圍狐兔韓百萬貔貅趨玉帳三千賓客冠金貂羅隱

古今事實

出鎮河中

郭子儀上元初詔為諸道兵馬都統令奉諸鎮之師徑抵范陽詔下旬日為魚朝恩所間事竟不行永泰元年以子儀都統河南節度使行營出鎮河中分紀

蕩滌羣寇

乾符黃巢大掠江淮宰相王澤曰臣忝宰相之長在朝不足分陛下之憂願自率諸軍蕩滌羣寇朝議然之乃拜守司徒平章事荆南節度使諸道行營兵馬都統唐會要

意氣相期

太宗引尉遲敬德為右一府統軍右僕射屈突通咸言敬德初歸國家情志未附請殺之太宗曰寡人所見有異遽命釋之引入卧内賜與金寶謂曰丈夫以意氣相期勿以小疑介意寡人終不聽諛言以害忠良今以此物相資表一時共事之情也是日因從獵於榆窠遇王世充領步騎數萬來戰世充驍將軍單雄信領騎直趨太宗敬德躍馬大呼橫刺雄信墜馬敬德翼太宗以出賊圍太宗謂敬德功最多比眾人證公必叛天誘我意獨保明之福善有徵何相報之速也特賜金銀一篋恩眎日隆

官序相當

德宗幸梁洋回初廢天威軍左右神策軍舉西漢謁者隨何下淮南功拜為中尉故事命神策監軍為中尉又以功臣數多或

有秩至司空僕射罷鎮入朝無官序相當乃置六軍統軍秩視六尚書為節制廻翔之地 分紀

柘臯敗虜

李顯宗字君錫兀木寇邊劉光世充三京等路宣撫使表公為本司前軍都統制上以宸翰賜公曰卿如立奇功與卿建節諸將會淮西戰于柘臯兀木大敗公追至孔城奪耄倪之被虜者以萬計 言行錄

和尚原戰

丞相魏國張忠獻公浚兀木欲窺蜀公令陝西都統制吳玠於鳳翔府之和尚原先處戰地誘致其來兀木引眾十餘萬來犯玠與虜戰凡三十餘陣兀木中箭而遁俘其將羊奇孛董及酋領三百甲殺賊眾橫屍滿野兀木其眾損者過半皆吟呻扶攜以歸 同上

大人洲戰

李顯忠時逆亮犯順公以池州都統移軍舒城除御營先鋒都統制堠騎報賊兵萬人渡淮公領趙康年等與虜戰于大人洲首挫其鋒乘勝掩擊過淮虜軍溺歿者千餘人 同上

立功取節鉞

賊眾劉猗十萬已次于濠壽之間張浚拒之詔併以淮西軍屬浚沂中為張浚統制官浚遣沂中至泗州與浚合且使謂之曰上待統制厚宜及時立大功取節鉞或有差跌浚不敢私 言行錄

破賊復江州

和義楊郡王沂中傳李成叛江南招討使張浚議所以破賊王時為右軍統制官遂由上流徑絕生米渡出賊不意遇其先鋒擊退之賊將馬進銳卒數萬來犯浚率步兵攻其前沂中乃將騎數千與神武後軍統制陳思恭出山後前後夾擊乃大破之遂復江州 同上

古今文集

雜著

張韓公廟碑銘

李遐叔 華

唐之元老有大庇於生人曰韓公公盡禮大朝位尊將相三城立廟軍帥乞靈則祠之天保季歲華奉使朔方展敬祠下式瞻風采像與神合沉沉如生嗚呼生以公為臣歿以靈為神神乎宜奉公總戎疆外懸衡審政拒隴循河縣巨萬里堅城雄防扞敵三輔介冑之士垂十萬人瞻我麾節以為進退先是突厥犯塞乘勝入朔方游騎至安定官軍不到經畧失守虜乃驅監牧之騾牝退存廬帳進圍聚邑鳴弓躍馬規復漠南邊人推心元聖軫念節將更至咸以為請搢紳獻議則以和親為便中宗未之許也初以公耄老且重煩之及卜師於大宮之庭唯公之吉至尊親臨前殿授以兵符公承命徂征北蕃逆駭記所謂君子有其時有其命公得其二而伸其一者也公忠貫神明慮幾造化鎮以長策潰其奸謀一麾偏師屠名王復喪馬奪塹拂雲維而城之竝阿之法列築三鎮將精士銳談笑就役匈奴莫敢南視雷哭而遁老幼望公以相震怖不然則乘冰轉鬪無日無之

既而據河山翫其動靜納行旅歸之衽席憑墉而望匹馬單兵
不匿形影虜由是械手足而剗腹心朝廷無草竊之虞矣天下
減征役之半矣詩云文武吉甫萬邦為憲又曰方叔元老克壯
其猷公之謂也帳下之厮尚有存者曰公號令素嚴人無違禁
自將吏騎卒咸有旌表節不常出出則賞罰隨之賞無非功罰
無非罪正流而下競心行而事從謀全功成由此術也三城既
就刊木標櫓記之種落刻其降年後皆知之豈挺生上將之龜
策也竒鑿生物之然也夫鳥獸草木出則倫董猶或利害馮焉
况殊績功勳始終天地翼輔先聖寵綏元元有茅杜之尊符節
之重後奉者果一勝遂一謀庸非聖明幽贊之效雅有吉甫薄
伐至于太原王命南冲城彼朔方傳稱齊桓伐戎攘狄以其病

燕滅衛魏絳和戎狄合諸侯從古及今以為大功其餘秦恬漢
青之倫纒丘垤耳尚或筮頌颺之簡冊貴之况忠武卓異屢復
今昔而詠歌無之非古也竊感趙孟懷隨武之德寤寐咏歎奉
銘神宮其文曰

赫爾韓公同武有經受命北伐渠魁就刑敢或不順鼓行風霆
崇岱壓卵滄波灌螢沉泉雷動機發冥冥功奪三城人謔億齡
謀出先後構危於寧張天之威恢廟之靈北狄頓顙山戎來庭
萬里寢柝緣河罷局趨拜故祠德謝惟馨翔野何有群山青青
感激遺風徘徊涕零吾誰與歸式薦斯銘

律詩

次潼關上都統相公

韓愈

暫辭堂印執兵權盡管諸軍破賊年冠蓋相望催入相待將功德格皇天

塞上贈王太尉

僧惠

飛將是驃姚行營已近遼河水堅度馬塞雪密藏鷗敗虜殘旗在全軍列帳遙傳呼更號令今夜取天驕

和聖製送石蒙都護兼鴻臚歸安西 王維

上卿增命服都護揚歸旆鳴笳瀚海曲按節陽關外落日下河源寒山爭秋塞無戰是天心天心同覆載

上裴行軍都統

耿緯

胡塵已滅天山外閉閣陰陰日復曛櫪上華駟嘶鼓角門前老將識風雲旌旗四面高秋見絲竹千家靜夜聞莫道古來多計

策功成唯有李將軍

贈超將軍

孟郊

當年膽畧已縱橫每見妖星氣不平身貴早登龍虎道功名自拔鹿頭城尋常得對論邊事委曲承恩掌內兵會取安西將報國凌烟閣上早書名

管軍總管

歷代沿革 **魏**黃初始制都督諸州軍事 **後周**改都督諸軍事為

總管武帝時以王謙為益州總管之名始此 **隋**文帝以并益

荆揚四州置大總管其餘總管府置於諸州列為上中下三

等加賜持節煬帝改帥都督為旅帥 **唐**諸州復有總管亦加

賜持節刺史亦加號持節武德初邊要之地亦置宋馬步軍都總管以節度使充副總管以觀察以下充有止一州者有數州為一路者有帶兩路三路者或文臣知州則管勾軍馬事舊相重臣亦為都總管有禁兵駐泊其地者冠以駐泊之名

名咸平廢三路都總管景德詔鎮定兩路併為一路諸路並去行營之名止為駐泊總管慶曆三年詔近分陝西緣邊為四路各置經略安撫招討等使自今路分總管鈐轄以上許與都總管司同議軍事路分都監以下並聽都總管等節制違者以軍法論七年析河北四路各置都總管一員如無事止以安撫使總制諸路八年諸州部置並改總管兵馬總管副總管總管舊曰部署英宗廟諱改焉有兵馬總管副總管

凡武臣以諸司使以上充文臣以兩省五品以上充一州即為兵馬總管一路即為步軍總管副總管建炎元年李綱言

守備當於汾河汾淮汾江置帥府要郡以控扼其帥府文臣一員帶安撫使馬步軍都總管武臣一員充副總管改路分為副總管遇朝廷起兵則副總管為帥副鈐轄都監各以兵從出聽其節制正官願行者聽紹興二年要郡守臣罷帶兵職諸路副總管可依舊改充路分鈐轄五年密院言東南多事合要近上官總領軍政乃詔兩浙江南荆湖福建廣東可依三路置總管於帥府七年淮東置總管十二年諸路並置州總管一員元有管軍總管其下有管軍上千戶管軍中下千戶管軍總把管軍上中下百戶等員

當今名將

太宗曰當今名將惟李勣薛萬徹江夏道宗而已以青丘道行軍總管伐高麗拔其城

唐薛萬徹傳

任以藩岳

唐高祖詔黎州總管曹國公徐世勣本自黎陽擁徒歸順任以藩岳誠效克彰

遼東獻俘

李勣為遼東道行軍大總管率兵二萬執高藏男建等詔勣獻俘昭陵

定襄制敵

唐裴行儉為定襄道行軍大總討之行儉曰以謀制敵可也因詐為糧軍軍伏壯士五輩又伏精兵踵其後虜果掠車壯士突討伏兵至殺獲幾盡

箭定天山

唐薛仁貴副鄭仁恭為鐵勒道行軍總管將行宴內殿帝曰古善射有穿七札者卿試以五甲射焉一發洞貫九姓眾十餘萬令驍騎來挑戰仁貴發三矢輒殺三人虜氣懾皆降軍中歌曰將軍三箭定天山將士長歌入漢關九姓遂衰

俘滅三國

蘇烈字定方為神丘道大總管討百濟俘其王義慈等所滅三國皆生執其王

軟血敗羗

膠東王道彥從李靖擊吐谷渾詔為赤水道總管帝厚以利啖
党項使為鄉導其酋拓拔赤辭詣請自言隋擊吐谷渾我資其
軍而隋無信反見仇剽今將軍若無他我願資糧諸將與軟血
遣之道彥至濶水見無備因掠其牛羊諸羗怨為赤辭所乘軍
大敗

棄舟降銑

江夏王孝恭信州總管蕭銑據江陵俄進荆湘道總管統水陸
十二軍發夷陵破銑二鎮縱戰艦於江中諸將曰得舟當濟吾
用棄之反資賊柰何孝恭曰銑之境南際嶺左薄洞庭地險士
眾若城未拔而援至舟多何所用之今銑瀕江鎮戍見艦舟蔽
江下必謂銑已敗不即進兵覘候往返以自救朝則吾拔江陵
矣已而救兵到巴陵見船疑不進銑內外阻絕遂降

戰俘名王

李大亮為河東道大總管出北道與虜遇蜀渾山大戰破之俘
其名王

戰獲可汗

襄邑王神符遷并州總管頡利可汗盜邊神符與戰汾東斬級
五百獲馬二千及戰沙河獲乙利達官得可汗所乘馬及鎧

擊下十城

李大亮擢金州總管府司馬王洪烈據襄陽詔大亮安撫樊鄧
因圖之進擊下十餘城

進拔八城

契苾何力蓋蘇文歿男子為弟所逐使子詣闕降乃拜何力為遼東道行軍大總管安撫大使經畧之副李勣同趨高麗勣已拔新城乘勝進拔八城引兵還與勣會何力率兵五十萬先趨平壤虜其王以獻

便宜決事

裴寂受晉州道總管討賊以便宜決事賊將宋金剛據介州寂屯度索原賊埭水上流寂徒屯為賊所薄兵大潰

宣布恩意

李靖授嶺南撫慰大使檢校桂州總管以嶺海阻遠久不見德非震威武示禮義則無以變風即率兵東巡所過問疾苦延見

長老宣布天子恩意遠近懽服

霹靂域內

唐長孫晟為秦川道行軍總管出討突厥晟斬千餘級有達官來降言突厥大畏長孫總管聞其弓聲可謂霹靂見其走馬稱為閃電晉王笑曰將軍震怒威行域內分紀

踈血虜庭

李靖為定襄道行軍大總管率勁騎三千由馬邑趣惡陽嶺頡利可汗大驚曰云云太宗曰靖以騎三千踈血虜庭遂取定襄古未有輩足澡吾渭水之耻矣唐職林志

召詔入朝

泉男生授平壤道行軍大總管兼持節安撫大使舉哥勿南蘇

倉巖等城以降帝命舍人李虔繹就軍慰勞賜袍帶金鈿七事
明年詔入朝所過州縣傳舍作歌吹右羽林將軍李同以飛騎
迎寵

先登報國

唐張士貴貞觀中爲龔州道行軍總管太宗以其冒矢石先登
勞之曰嘗聞以忠報國者不顧身於公見之

壘書褒勞

郭孝恪焉着王叛孝恪請擊之卽拜西川道行軍總管率步騎
三千出銀山道夜襲其王龍突騎支虜之帝悅降壘書褒勞

金瓶賜勞

秦叔寶事秦王府拜馬軍總管戰美良川破尉遲徵有功帝賜
以黃金瓶勞曰卿不卹妻子而來歸我且又立功使朕肉可食
當割以啖爾况子女玉帛乎

賦詩祖道

張仁愿爲朔方軍總管春還朝秋復督軍備邊帝爲賦詩祖道
賞賚不貲

請斷石嶺

竇靜請斷石嶺以障塞突厥去入

勇冠三軍

薛萬鈞爲沃沮道行軍總管從李靖討吐谷渾復馳進擊斬數
千級勇冠三軍

職林

裂地獻俘

高麗莫支離男生爲其弟所逐遣子乞師詔勣爲遼東道行軍總管率兵三萬討之破其國執長藏男建等裂其地州縣之詔勣獻俘昭陵同上

銳士深入

侯君集李靖討吐谷渾以君集爲磧石道行軍總管君集曰王師已至賊不據險天贊我也若以精兵掩不備彼不我虞必有大利靖然其計簡銳士約齊深入大戰破之

獨全軍歸

李靖爲行軍總管以江淮兵萬人屯大谷時諸將多敗獨靖全軍歸俄權檢校安州大都督

率部落降

李勣爲通漠道行軍總管出雲中與突厥戰走之引兵與李靖合因曰頡利若渡磧保於九姓果不可得我若約齊薄之不戰縛虜矣文靖喜以與已合於是率衆夜發勣勒兵從之頡利欲走磧勣前屯磧曰不得度由是酋長率部落五萬降于勣拜大都督府長史

決策深入

吐谷渾寇邊李靖往見房玄齡曰吾雖老尚堪一行帝以爲西海出軍大總管靖決策深入遂踰積石山大戰數千百人多降吐谷渾伏見自縊歿

擊賊大奔

蘇烈擢伊麗道行軍大總管復征賀魯侯斤嬾獨祿擁衆萬帳

降烈撫之賀曾率十姓兵十萬拒戰輕烈兵少舒左右翼包之
烈令步卒據高攢稍外向賊三突步陣不能入因其亂擊之賊
大奔

鬼章遂降

姚兕字武之爲環慶路馬步軍副總管改鄜延移鬼章據洮州
謀言青唐欲將兵由講珠梁會于佻合寇我疆兕自何州率兵
破六通宗城夜遣驍將縱火講珠梁明日青唐兵至不得遂佻
州之援鬼章遂降東都事畧

木征遂降

燕達爲秦鳳路副總管何州景思立陷於踏白城達討山後諸
羌斬首四千級還至訶喏城木征遂降同上

總領軍政

見前沿革

總治軍旅

哲宗正史職官志總管鈐轄司掌總治軍旅屯戍營防守禦之
政令凡將兵隸屬者訓練教閱賞罰之事皆掌之

續會要

機速專行

熙寧中詔諸路如遇出入之本司兵馬機速事申稟不及者副
總管得專行同上

機宜熟識

景德中以叅政王欽若判天雄軍兼都總管初帝曰天雄且爲
重鎮思得熟識機宜行事果斷者蒞之於是欽若請行

分紀

燕達戰功

熙寧五年以燕達權發遣環慶路駐泊總管掌州之役達有戰功故自鈐轄躡遷總管然自資淺故令權發遣自燕達始也實錄

狄青材勇

狄青自漢臣京師呼為狄天使上嘉其材勇為涇原路兵馬副總管上欲一見之詔令入朝會寇逼平原乃令亟往涇原俾圖像以進上觀其儀表曰朕之關張也於是有狄萬人之稱以敵萬人也

札授方畧

宋淳化中以叅政趙昌言為川陝兩路兵馬都總管太宗以蜀寇尚有殘孽會昌言安撫招討仍賜御札數幅丁寧授以方畧委任雄盛分紀

御賜秘畧

景祐四年以御製神武秘畧賜沿邊總管鈐轄每得代更相授之同上

遵裕知軍

熙寧五年上謂執政曰王韶經制饒佻獨高遵裕能叶力與都鈐轄如何王安石曰縱與權總管亦無害蔡挺曰如此即當罷知通遠軍蓋自來無總管離帥府而知軍州者上曰有事宜即出駐劄使知軍亦何妨安石曰總管知軍與鈐轄何異亦不須舊制有無也乃以遵裕知通遠軍權熙河總管實錄

張劉再任

熙寧四年涇原路都總管張玉郎延劉永年並令再任玉與一

子官樞密使文彥博曰兩人同是用而推恩不同上曰王累有戰功末年但久熟鄜延未有代之者若一槩推恩無以激勸

上言耶律患

天聖七年劉平授忻州團練使屬上封事言趙元昊連姻耶律必為邊患授邠寧環慶副總管遣中人就賜黃金器

請持夏國臂

种子諤字子正李憲措置熙河邊事子諤鄜延路副總管秉常為母所囚子諤入對大言曰夏國無人秉常孺子臣請持夏國臂而來神宗壯之

東都事畧

古今文集

律詩

奉和幸望春宮送朔方軍大總管張亶詩

李嶠

玉塞微驕子金符命老臣三軍張武旆萬乘餞行輪猛氣凌玄朔崇恩降紫宸投醪還約士辭第本忘身露下鷹初擊風高鴈欲賓方銷塞北侵還靜漠南塵

獻丘常侍總管

許渾

詔遣將軍護北戎身騎白馬臂彤弓柳營還識金貂貴榆塞遙知玉帳雄秋檻鼓鼙驚朔雪曉波旌燾起邊風蓬萊每望平安信應奏班超定遠功

贈淮西賈兵馬使

釋清江

破虜功成百戰場天書新拜漢中郎映門旌旆春風起對客絃

歌白日長

文類聚外集卷之六 終

王奉禮魏子金符命三月二軍於左武萬乘濟行解益康志立
奉味幸望春宮武陳式軍大縣音款宜信
李 酬

新編古今事文類聚外集卷之七

南江 富大用 時可 編

金陵 唐富春 子和 刑

諸使司部

宣慰使

歷代沿革 宣慰使始於唐初元和置淄青兗豫等州宣撫使後始置宣慰使大率藩方不靖則遣重臣宣諭慰安之故有宣慰使之名宋置宣諭使以宣諭德意為職而已不與軍事無宣慰官元沿唐制置宣慰使副使斷事官經歷知事等員

古今事實

事文類聚外集

卷之七

宣慰使

持節直入

徐州張建封卒兵亂囚監軍逼建封于愔王軍務帝以李鄴剛
敢拜宣慰使持節直入其軍大會士諭以禍福出監軍獄中脫
桎梏使復位愔即上表謝罪稱留後鄴曰非詔命安得輒稱之
削去乃受既還稱旨遷郎中

行營面詰

憲宗因淮西久未成功遣尚書左丞許孟容行營宣慰令面詰
賁光顏重胤一月內賊平

宣慰河北

王縉祿山亂擢太原少尹佐李光弼以功加憲部侍郎遷兵部
史朝義平詔宣慰河北還有旨俄拜黃門侍郎同平章事鎮河

東節度

本傳

宣慰魏博

田弘正圖魏博相衛且漶之地籍其人以獻憲宗美其誠詔充
魏博節度使又遣裴度宣慰度明辨具陳朝廷厚意弘正不覺
自失乃深相結納奉上益謹復請度徧行其部宣示天子恩詔
魏人由是歡服又裴度至魏博宣慰以錢百五十萬緡賞軍士
六州百姓給復一年軍士受賜歡聲如雷

並本傳

馬總副裴度

馬總副裴度宣慰淮西吳元濟擒為彰義節度留後蔡人習偽
惡相掉訐獷戾有夷貊風總為設教令明賞罰磨治洗汰其俗
一變

本傳

巢父見田悅

孔巢父為魏博宣慰使巢父辨而才及見田悅與言君臣大義利害逆順時悅父不臣喜曰不圖今日還為王人酒中悅起自陳騎射且曰陛下見用何敵不摧巢父曰若爾不早引歸乃一劇賊耳國方多虞待子而息數日田緒殺悅遂與大將邢曹俊等聽命巢父即以緒權知軍務紓其難

無若孟陽

唐憲宗詔潘孟陽往江淮察諸使治否孟陽所至流連倡樂招金錢其後鄭放宣慰江淮帝譏之曰無若潘孟陽殫才費醢飲遊山寺而已

卒害真卿

盧杞德宗時拜同平章事既得志險賊浸露賢者媚能者忌小忤已不傳死地不止李希烈反杞素惡顏真卿挺正敢言即令宣慰其軍卒為賊害李揆有雅望畏復用遣為吐蕃會盟使卒于行天下無不痛憤以杞得君故不敢言本傳

宣撫使

歷代沿革唐元和十四年淄青兗鄆等十二州平詔戶部侍郎楊於陵以本官充淄青等宣撫使宋祖宗時不常置有軍旅大事則命執政大臣為之累朝但除向文簡范文正富文忠文忠烈韓獻肅五人仁宗征儂智高以狄青為宣撫使武臣宣撫自此始建炎三年張魏公以知樞密院為宣撫處置使其後杜丞

相周仲弼孟富文趙元鎮虞樞甫王公明鄭仲一沈德之輩皆自二府出爲之虞公始以元樞除大資政矣上恐未足爲重後二日乃復帶知樞密院事焉若前宰相爲宣撫則自渡江已後亦止除李伯紀呂元直朱葺二三人紹興元年劉光世以使相宣撫淮南武臣非執政而爲之自此始二年李泰發以端明殿學士爲壽春等州宣撫使文臣非執政而爲之自此始然自紹興至嘉泰武臣止劉光世韓世忠張俊岳飛吳璘從官止李光發王伯似二人蓋重之也元仍唐宋制置之

古今事實

便宜行事

樞密直學士明鎬討具州未下叅知政事文彥博請自往督戰以彥博爲河北宣撫使彥博奏今在軍中請得便宜從事上許之閏月克貝州擒王則

涑水記聞

節制諸將

鄭剛中字亨仲爲川陝宣撫副使節制諸將極其尊嚴二都統每入謁必先庭揖然後就坐及吳璘升檢校少師來謝語主閤吏求講鈞敵之禮剛中曰少師雖尊猶都統制耳倘變常禮是廢軍容璘惶恐聽命

中興係年錄

活飢民

慶曆二年韓琦宣撫陝西屬歲大飢羣盜嘯聚悉討平之是歲河中同華等十餘州飢民相率東徙選官發省倉以賑之蒲華同三州所活百五十四萬餘人他州稱是召琦歸缺

編年備要

修軍政

虞忠肅公允文為四川宣撫首劾大將任天錫剝下為苞苴又
劾守令劉洪宋琛等十一人之病民者又薦可為將帥三人進
偏裨二百餘人諸軍歡呼四蜀交賀於是開公平之路絕請謁
之私而軍政修矣言行錄

智高戰敗

狄武襄公青廣源州蠻儂智高叛連破七州仁宗遣青為宣撫
使率眾擊之至賓州時儂寇還守邕州青懼峴輪關為所據乃
下令具五日糧休士卒賊謀知不為備是夜青率眾半夜度峴
崙關近邕州賊方覺逆戰於歸仁鋪賊遂大敗

忠彥械誅

李綱字伯紀為湖廣宣撫使有統制官張忠彥者駐軍廣州頗
擾一路公為宣撫使召之不來公察忠彥樂為郡檄令權知岳
陽忠彥果至即械送所司取旨誅之並同上

僉書出鎮

治平三年以僉書郭達宣撫陝西判渭川上曰第領樞職獨重
使權自呂余慶以叅知政事知成都其後見任執政無守藩者
至達始以僉書出鎮編年備要

御殿置宴

咸平三年詔兵部侍郎叅知政事向敏中充河北東路沿邊宣
撫大使樞密直學士馮極陳堯叟充副大使巡按郡國存問官
吏將校耆老百姓等真宗御長春殿置宴以遣之

就拜平章

韓康國公絳熙寧二年夏寇大入慶州境以公為陝西宣撫使自受命至陛辭三日而行贈金繒及織文袍纜至邊悉與將吏治兵郵延使和諤出青澗城公欲自高奴通道河東詔兼河東宣撫使就拜同中書門下平章事

言行錄

功出儒者

虞忠肅公允文字彬父逆亮叛順王權失律公以宣撫視師江上大破賊軍逆亮遁入揚州是日李顯忠至公曰京口無備我欲往公能分兵見助否顯忠即分李捧軍一萬六千人及戈船百艘會于京口公至京口謁劉錡錡曰朝廷養兵三十年我輩一技不施今日大功乃出於一儒者我輩愧死矣

同上

古今文集

古詩

和餞王駿巡邊

張說

六月歌周雅三邊諭夏卿欲施攻戰法先作簡稽行禮樂知謀帥春秋識用兵一勞堪定國萬里即長城策布和戎利威傳破虜名軍前雨洒道樓上月臨管別藻瑤華降同衣錦襍榮關山由義近戈甲為恩輕絲竹路傍散風雲馬上生朝廷為吉甫邦國望君平

律詩

送鮑中丞赴太原

盧綸

暫趨西掖望全解北門憂專幕臨初護親管制督郵

送范司空赴朔方

呂溫

築壇登上將滕席委前籌虜滅南侵趾朝分北顧憂抗旌廻廣漢撫劔動旄頭

安撫使

歷代沿革梁武宗普通六年魏以鄆道元為大使慰撫六鎮大使始此隋文帝開皇九年詔遣柱國韋洸安撫嶺外又仁壽四年以楊素為并州道行軍總管河北道安撫大使唐正觀初遣大使十三人巡省天下諸州水旱則有巡察安撫存撫之名節度使兼之則有副使天授二年發十道存撫使聖曆中狄仁傑為河北道安撫德宗正元又置副使宋舊不常置自咸平二年以翰林學士王欽若為四川安撫使知制誥梁顥為陝西安撫

使安撫使之名始此其後景德三年始置河北沿邊安撫使以雄州守臣為之而陝西沿邊諸州亦有安撫使慶曆二年詔置湖南安撫司八年詔置河北四路安撫以韓琦王拱辰賈昌朝等充諸路使皇祐四年詔廣桂二州帶經略安撫使熙寧五年罷諸路經略安撫司崇寧二年置河南安撫使宣和二年置輔郡內穎昌府帶京西安撫使宣和三年臣僚言睦賊猖獗乞以杭越知州兼本路安撫鎮撫一方詔杭越州江寧府守臣並帶安撫使詔洪州守臣可依江寧府安撫使凡諸路安撫逐州知州兼以直秘閣以上充掌總護諸將統制軍旅察治姦宄以肅清一道凡兵民之政皆掌焉帥其屬而聽其獄訟頒其禁令定其賞罰稽其錢穀甲械出納之名籍其行以法若事難專決則

具可否稟奏即干機速邊防及士卒抵罪則聽以便宜裁斷係
邊任則綏御夷狄撫寧疆圉若甲兵屯戍芻粟餽運則視其緩
急盈虛而移用之掌凡戰守之事建炎元年李綱請沿河沿淮
沿江置安撫使兼馬步軍都總管以文臣充二年令將兵處知
州帶管內安撫使後省四年置鎮撫使罷逐路安撫使後罷鎮
撫使置安撫使如故時諸路又有安撫大使自兩浙西路劉光
世始二品以上為帥即為安撫大使元有安撫使又有副使正
使正三品副使正四品

羣書要語內有百揆四岳外有州牧侯伯書藩侯詩千里之外

設方伯記受瑞析圭建麾作牧文選當藩垣屏翰之任有弓矢

鐵鉞之權韓文送俱文珍序五都伯長送張章子序方州大臣

答元侍御書大夫烏公以鐵鉞鎮河陽送溫造序來帥能寵四

方作儀連理木頌出谷岳政入填邦紀惠文太子冊翳我輔臣

伯茲列岳冊尊號赦尹正大都節度羣州皇甫湜荆南判官廳

壁記大旆高牙任雄節制楊億代表代荷寵榮謬居垣翰李師

道詔無安帥節之樂猶侍衮衣之選韓琦判相州制

詩句印綬歸台室旌旗別將壇韓愈李十八次襄城分闡救世

用賢豪趙公玉立高歌起杜近來廊廟多西帥出相誰言只在

東楊誠齋送丘密帥蜀西蜀宣威百萬兵會須號令自精明同

上京兆從教思廣漢會稽聊喜得方回東坡送錢穆父守越

古今事實

士服威愛

程務挺以左衛大將軍為單于道安撫大使禦突厥務挺善綏士服其威愛突厥憚不敢寇邊

唐會要

帝稱文武

儀鳳二年詔裴行儉為安撫大食一使歸至京師將吏為刻石碎葉城紀功帝勞曰行儉提孤軍深入萬里兵不血刃叛黨禽夷可謂文武兼備矣

職林

乞赦脅從

狄仁傑字懷英突厥入趙定標掠遁去拜仁傑河北安撫大使時民多脅從於賊仁傑願曲赦河北一切不問詔可

同上

許以便宜

馬儉為并州道安撫大使許以便宜

全活飢民

韓魏忠獻王琦益利路人飢為體量安撫使公至則蠲租減稅以募人入粟招募壯者刺以為廂禁軍檄劔門關民流移欲東者勿禁全活飢民百九十萬蜀人曰使者之來更生我也

體量官吏

范雍充陝西沿邊州軍體量安撫使詔所至察訪邊民利害及體量官吏能否

會要

大修戰陣

錢若水撰劉肅公珙謚議公鎮江陵條上兵少才匱之狀除去詭名虛籍之弊大修部伍戰陣之法且謂襄陽兵戍久屯不歸為不便則立番休之制軍情大悅

大戢驕兵

程明道撰彭思永行狀云河朔謀帥以公鎮高陽時狂於承平治兵者鮮明紀律公為帥方重嚴正犯者頗以兵法從事驕兵大戢

錄問繫囚

咸平三年以翰林學士王欽若為并州道安撫大使知制誥梁顥為陝西路安撫使所使錄問繫囚真宗諭之曰朕觀省風俗尤難其人數日思之無易卿等各宜宣布德澤使知朕勤恤意惠愛百姓

張忠定公壽外和內剛臨事有仁者之勇在蜀四年尤著惠愛百姓皆畫像以事後帥李玿贊云公昔在蜀千載一人公今去

蜀千百其身願公再來以慰斯民蓋實錄也

周益公集

到部賑貧

韓康國獻肅公絳字子華江淮兩浙歲飢以公體量安撫江夏東西二路到部則發倉廩賑貧乏問百姓疾苦

畫策弭盜

宰執奏福建安撫葉夢得措置再盜之事上曰盜之竊發多緣守令非人培克所致宜令帥司條具凡有害於民者除之自此公或招或捕或誘之相戕三策並用

莫濬撰葉夢得行狀

畫像立祠

韓魏公所歷諸大鎮皆有遺愛人人畫像事之獨魏人立生祠為塑像歲時瞻莫比狄梁公戎狄尤畏公名凡使契丹及來使

言文類事卷之七
者必問韓侍中安否言行錄

選道拜泣

許汾知鄧州兼荆南西路安撫使政尚寬簡務為勸戒而人盡其情庭無留訟蓋一本於誠信故人愛服之在鎮四年一路獄空者八十縣鄰路飢流詔公賑濟活二萬六千九百有奇去之日百姓遮道拜泣比之召父杜母而立祠于堂許龍圖行狀

錄諸將功狀

劉忠肅公珙巨寇李金奮起為亂以公為荆湖南路安撫使公入境賊眾已數萬公檄鄰道謹斥堠守隘塞亟奏請下荆襄發卒又遺書制置使沈介請毋須報而亟遣介為遣兵官軍日盛而賊勢日衰於是賊徒執李金以降酋黨盡戮既乃錄諸將之

功狀列上不以一毫有所私上嘉嘆再三朱晦菴報行狀

薦諸將可用

王文忠公堯臣元昊反以公為陝西體量安撫使視四路山川險易還言某路宜益兵若干某路賊所不到某路宜急為備至於薦諸將其可用者二十餘人後皆為名將言行錄

古今文集

雜著

代表相公讓河南府道副元帥表 常袞

伏以東征之寄相宅之選皆周召之臣保釐統一也故二南風化見美詩人况洛邑經陸渾之戎有舊染之俗賴陛下發皇明以燭之布陽和以煦之流散稍歸傷痍甫起然猶師居之任宜

得經濟之才自河而南至于吳楚節制戎律半於天下非宏略
傑出功冠一時不可以專五侯九伯之征總衣裳兵車之會臣
以衰朽薄劣待罪台司塵辱尸忝無裨朝政每趨宸陛益愧周
行豈謂殊常之恩屢出非望注意之責并在微軀憂懼慙惶寸
刻難措臣聞唯名與器不可假人審已量力未宜虛授若貪榮
冒寵黽勉苟容神明昭昭必速其害伏望歷求百辟委之兼才
以分二老之任用增九鼎之重則至公大行羣下知勸無任懇
迫之至

辭免知福州安撫狀

真德秀

視邦選侯無越帥藩之重臨人蒞政莫如鄉部之難兼此寵榮
惕焉震懼伏念臣材非敏銳學最空疎兩朝千載之逢存誇華
顯一節四麾之寄茂著勞能自撫舊邦偶承極弊邑有積年之
預借州無旬日之宿儲重以公姓實蕃廩祿弗繼內循薄技既
初無鞭筭之長俯眎窮疇寧忍用箕歛之術輒效求芻之義冒
干行葦之仁天憫皇宗歲頒僧牒獲少寬於憂窘方勉竭於撫
摩粗銷田里之歎愁即丐山林之間散未能底績遽已饗恩陞
近職於文謨付中權於閩服顧慙謏曷稱褒遷不稼取禾難
追公言之誚維桑與梓更虞本道之嫌敢瀝忱辭冀回渙渥

論帥臣不可輕出

樓鑰

臣竊惟諸道置帥官稱安撫兼兵民之權有分閩之制朝廷選
擇甚重不輕比年以來遇有盜賊竊發州縣所不能制者必使
帥臣親行雖多成功臣竊慮此水旱飢饉既不能免潢池弄兵

安保其無若自此以為故事帥臣動輒臨戎恐非國家之長策也仰惟神宗皇帝垂意邊事而謨深遠乃熙寧九年知成都府蔡延慶言乞發陝西兵援茂州俟兵集自將以往令轉運司攝府事詔朝廷已遣將部兵延慶務在持重毋得輕去成都元豐六年河東經略司言西賊入麟州神堂寨知州訾虎等領兵出戰有功詔虎自今毋得輕易出入遇有寇邊止令裨將出兵擒逐神宗之慮深矣蓋帥守之臣民之司命一有失宜衆心易動當令指授方略調度軍食持重鎮撫以靖一方雖有控劔根本不搖若使輕出利害實大蓋帥臣之行建牙郊野堪戰之士咸在行陣從行兵卒必是單弱而又隨宜遷次登陟險隘脫有黠桀之盜伏隱篁竹乘間提出以犯大帥之顏行則賊勢易張國

威難振倉卒之頃可勝言哉故延慶有請既拒而不從訾虎成功亦因以切戒此臣平日之所慮適合信使之所傳無事而言似非時務愚者一得願效君前伏惟俯矜微悃曲留宸念臣甚

古詩

呈王中丞盧院長

韓愈

聲名動朝闕光寵耀京洛勿午降綵綸中堅擁鼓鐸江淮永清晏宇宙重開拓印從負鼎假門為登壇鑿再入更深巖又逢彌蹇謬賓筵盡孤趙舞騎多衛霍帶垂蒼玉佩轡盛黃金絡五門氣爭呼六奇心運度

送薛穎叔帥熙河

蘇子瞻

西方猶宿師論將不及我苟無深入計緩帶我亦可我欲歌杖

杜楊柳方婀娜邊風事首虜所得蓋么麼願得魯連客一射聊
城寄

送元厚之帥福州

王介甫

元侯文章翁更以吏能著今爲大帥府千里來赴想銜詔出黎
嶺方爲遠人慕旌旗滿流水冠蓋東門駐

律詩

聞晉公自蔡州入覲

韓愈

南代旋師太華東天書夜到冊元功將軍舊壓一司貴相國新
兼五等崇

贈淮西賈兵馬使

釋清江

破虜功成百戰場天書新拜漢中郎映門旌旆春風起對客絃

歌白日長

送鄧漕移帥揚州二首

周必大

碧幢紅旆擁西風幾點淮山落眼中臥轍正看留使者褰帷早
已識元戎兒童騎竹迎并牧父老封棠記召公人望汲卿居禁
闈淮陽只恐又匆匆

聞道維揚地望雄風流人物似江東六龍前日臨淮海五馬由
來說醉翁壁月幾橋留夜色珠簾十里待春風遙知九日平山
會笑插茱萸滿鬢紅

留別金陵韓帥

仲通

二首

周必大

十二麟符玉截肪腰間仍映帶圖黃化行江國春常早一息階
除日自長槐影緩趨三接畫棠陰先滿十連堂于淵去踏長安

道待賦中和奏未央

再展賓筵又一朞
千金敝帚賴提撕
泮宮正采僖侯藻
太學俄甘吏部蠶
人似塞鴻春向北
心隨江水日潮西
太平勲業須公助
不用頻年戀節犀

送廣帥秩滿之官丹陽

楊廷秀

北門臥護要耆英
小試胸中十萬兵
天借金山冷落月
身兼鐵甕作長城
何知嶺上因歸路
摘取梅酸去作羹
已有紫泥教詣闕
便應留住付鈞衡

送朱師古龍圖少卿帥潼川

楊廷秀

壁水蓬山徧羽儀
頌臺公府更光輝
紫荷到眼垂持橐
黃菊關心便拂衣
鬻子運籌年尚少
買臣衣繡日思歸
少煩諭蜀須還

報却袖香烟侍太微

餞洪帥張伯子移鎮京口

楊廷秀

夢入飛雲卷雨簾
袖却築岩作露手
滕王閣上唐阿舒
春生秋殺震江湖
吏部未見張尚書
春生儘有秋殺無
江西十州百萬戶
父非姓召母非杜

餞趙子直出帥益州

楊廷秀

欽水花潭照碧油
西清學士舊鰲頭
隨身琴鶴如清獻
治蜀功名更蜀侯

送趙德老端明帥蜀

樓鑰

身名俱泰老尚書
叱馭寧辭萬里途
兩地恩榮真赫奕
四川父老定歡呼
垂崖袍帶今重見
清獻琴龜我更無
頻向籌邊樓上

望歸來方略上新圖

送溫州

蘇子瞻

威聲又數中興年二虜行當一矢聯聞道名城得真將故應驚
羽落空弦追鋒歸去雄三衛授鉞重來定十連

送福建張比部

王介甫

畫船簫鼓出都時萬里驚人去不追却望塵沙應駐節會逢山
水即吟詩

贈馮揚帥

楊次公

天下無雙士淮南第一州文章老元帥節鉞古諸侯路穩歸黃
閣功成建碧油風雲生鷁首蛟蜃怯龍頭

和送朔方大總管

李矯

玉塞微驕子金符命老臣三軍張武旆萬乘餞行輪猛氣凌玄
朔崇恩降紫宸校醪還約士辭第本忘身露下鷹方擊風高鴈
欲賓方鉞北塞祿還靜漠南塵

送嚴黃門再鎮蜀川

岑參

授鉞辭金殿承恩戀玉墀登壇漢主用有德蜀人思

送李中丞赴商州

韓翃

當年紫髯將他日黑頭公不異金吾寵兼齊王帳雄

上河陽李大夫

蘇子瞻

上將秉神略至兵無血威寒劒奪衆景夜星火長輝武牢鎖天
關河橋紐地機

經略使

歷代沿革 **唐** 正觀二年邊州別置經略使此蓋使名之起節度
 兼度支營田招討經略使則有副使判官各一人儀鳳二年
 以黑齒常之為河源軍經略大使永淳元年婁師德為河源
 軍經略副使至德三年賀蘭進明除嶺南五府經略兼節度
 使建中元年除元琇節度始不帶五府 **宋** 不常置咸平五
 年始以右僕射張齊賢為邠寧環慶路經略使判汾州諸路
 軍馬並受節度又以鄧州觀察使錢若水為并代經略使判
 并州自後不除人寶元中夏人入寇始命陝西沿邊大將皆
 兼經略皇祐間儂智高擾邊詔知廣桂州並帶經略安撫使

故後西南二邊常帶經略所以重紳權而服羗夷也其經略
 安撫各以直秘閣以上充掌一路兵民之事皆帥其屬而聽
 其獄訟頒其禁令定其賞罰稽其錢穀甲械出納之名籍而
 行以法若事難專決則具可否稟奏即于機速邊防及士卒
 抵罪則聽以便宜裁斷帥臣任河東陝西嶺南路職任緩御
 戎夷則為經略安撫使南渡之初依舊制廣南東路帶主管
 經略安撫司公事西路帶經略安撫使紹興五年令襄陽守
 臣湖北帥帶經略安撫使後罷而一廣如故 **元** 經略使正
 三品副使從四品經歷七品

詩 英英桂林伯實性文武才 韓愈 二十四州民樂否莫教一
 物怨窮途 張孝祥 紅旗照海壓南荒徵入中臺作侍郎 韓退之

贈刑部馬侍郎 斧鉞下青真樓船過洞庭北風隨爽氣南斗避
文星 杜甫送李大夫赴廣州

古今事實

威名流聞

戴叔倫為容管經略使綏徠夷落威名流聞其治清明仁恕多方略所至稱最德宗嘗賦中和節詩遣使者寵賜 唐職林

威聲風行

唐裴行立為安南經略使威聲風行

綏定八州

唐元結為容管經略使自諭蠻豪綏定八州民樂其教立石 德

都督諸軍

元和十二年御史中丞裴公來蒞茲邦都督二十七州諸軍州事盜息奸革德惠敷施祿年政成 柳子厚桂州賀家洲亭記

管嶺外地

唐涼公房為涼州經略管嶺外十三州之地稅節賦詩公私有餘削衣貶食不立資遺以班親舊為友為義

平嶺表夷

唐王雄字宏肱大曆中為容管經略使平嶺表夷獠代宗遣使慰勞加金紫光祿大夫 職林

恩被異域

宋朝余襄公帥二廣幾十年恩信被於異域如交趾大理特磨南詔之國皆可以願指氣使公之文武之才可謂其矣 言行錄

德著夷夏

范文正公帥邠延涇慶四都恩德著聞夷夏從服熟戶蕃部率稱曰龍圖老子至于元昊亦以此呼之

澗水燕談

外蕃貢珍

徐申字維降為容管經略使黃洞納質供賦不敢桀外蕃歲以珠璣瑁香文犀浮海至申於常賦外未嘗騰索商賈饒益

職林

寇攘順化

張公師為安南經略使自為吏習於海邦去之則夷獠稱亂復至則寇攘順化及受命專征牧人盡區處之方制國備形體之法道阻而備百貨地偏而具五穀儲峙委積師旅無庚癸之呼繕完板幹控帶兼戊巳之位皆用周禮率由漢儀易野老守險

逾丘陵而萬世無虞奇珍良貨溢于王府殊俗異類盈于藁街優詔累旌其忠良太史嗣書其功烈

唐職林

築城據要

范文正公為環慶路經略安撫招討使於延州築青澗城墾營田復永平廢寨熟羌歸業數萬戶於慶州城大順以據要害奪賊地而耕之又城細腰胡蘆於是明珠滅葳大族皆去賊為中國用

言行錄

弛禁通輸

劉徽猷子羽字彥修宣撫司移軍閬州吳玠戍河池王彥戍金州二鎮皆飢而興元帥過為守備閉關塞褒斜二鎮病之公乃承制拜公利路經略兼知興元府公至之日盡弛其禁民飢通

商輸粟二鎮乃安

言行錄

麾兵血戰

范仲淹知慶州兼經略招討使未幾賊兵三萬邛城仲淹麾兵血戰賊奔而北久之种世衡不利於定州以仲淹晝夜為領兵援初関人心搖動及見仲淹耀兵號令嚴兵威震戎落人心遂安相賀曰邊上自有龍圖公為長城吾屬何憂

究馬利病

張敬夫經略安撫廣南西路朝廷買馬橫山歲久弊積邊氓告病而馬不時至公究馬利病得六十餘條皆有以窮其根穴而事為之防由是諸蛮感悅爭以善馬來歲額率常先期以辨朱晦菴集

移檄交趾

余襄公靖字安道嘉祐五年交趾寇邕州殺五巡檢驛召公以為廣西體量安撫使公至則移檄交趾召其臣費嘉祐詰責之嘉祐惶恐對曰種落犯邊罪當必願留取首惡以獻即械送五人送欽州斬于界上言行錄

移文諭蜀

唐質肅公介知太原府河東經略使至則首戒邊將毋生事初代州岢嵐軍虜數擾邊公遣兵撤其境上堡柵又移文諭以利害嚴守以待之遂不復敢動

元昊欽畏

鄭戩字天休為陝西經略安撫招討使巡邊至鎮戎軍趣蓮花

堡元昊方擁兵近塞謂其下曰我已遣人使稱臣朝廷何為行用此公護諸將其欽畏如此

東都事略

蠻酋叩謝

李浩公字德遠為廣南西路帥有人對論擇帥事者上欣然顧之曰如廣西朕已得人矣李浩也公至鎮勤於民事郡舊有靈渠通漕運溉田甚廣歲頗湮塞公命疏治之民賴其利邕管所領羈縻安平州蠻酋特險凶橫聚兵謀為邊患公遣單使開心見誠諭以禍福即日叩頭謝過焚撤水柵受約束

曾季狸撰李

殿撰浩行狀

驚賊破膽

范仲淹與韓琦叶謀必欲外復靈夏橫山之地邊上評曰軍中

有一韓西賊聞之心膽寒軍中有一范西賊聞之驚破膽元昊

大懼遂稱臣

名臣傳

得人死力

唐劉蕤為隴右經略使輕財愛士得人之死力

簡閱州兵

南軒先生張栻經略安撫廣南西路所統州二十有五遼遠瘁殘故多盜賊檄外蠻夷間亦入塞為暴而州兵皆脆弱慵惰又乏糧食死亡輒不補公為之簡閱州兵汰冗補闕籍諸州掠卒伉健者以為效用合親兵摧鋒等軍日習而月按之視諸州有不足於糧賜若戈甲之費者更許漕司鹽本羨錢以佐之傳今溪洞酋豪諭弭盜睦鄰毋得輒相仇殺生事而他所以立恩信

事文類聚卷之七
謹關防亦無不備於是境內肅清方外柔服莫府無南鄉之慮
矣海菴文

節制諸司

予爲鄜延經略使日新一廳謂之五司廳延州正廳乃都督廳
治延州事五司廳治鄜延路軍事如唐之使忠五司者經略安
撫總管節度觀察處置五使今節度之職多歸總管司觀察歸
安撫司處置歸經略司其節度觀察兩案并支掌惟判官今皆
治州事而已經略安撫司不置佐官以帥權不可不專都總管
副總管鈐轄都監同簽書而下皆受經略節制沈恬筆談

祖於瓊林

咸平四年以兵部尚書張齊賢充涇原儀渭邠寧環慶鄜延州
保安鎮戎渭遠軍安撫經略使知制誥梁顥副之帝以邊將玩
寇朔方糧道艱阻故命齊賢等使焉卽命發日馳騎而往仍命
宣徽南院使周瑩祖於瓊林院

歸裝無南物

李殿撰浩爲廣南西路帥奉法循已律已甚嚴自嶺右歸裝無
南物

歸不載南物

余靖知廣州唐之番舶裝船舊皆取稅公奏罷之以徠遠商又
請立法戒當任官吏不得市南藥及公北歸不載南物

古今文集

雜著

桂州新城記

王介甫

儂智高反南方出入十有三州而十有二州之守吏或死或不
死而無一人能守其州者豈其材皆不足歟蓋夫城郭之不設
兵甲之不戒雖有智勇猶不能勝一日之變也天子於是遂推
選士大夫所論以爲能者付之經略而今尚書工部侍郎余公
當廣西焉寇平之明年蠻越接和乃古城桂州以至和元年八
月始作而以二年之六月成夫其爲役亦大矣蓋公之信於民
也久而費之欲以衛其財勞之欲以休其力以故爲是有大費
與大勞而人莫或以爲勤也故文王之起也有四夷之難則城
下朔方而以南仲宣王之起也有諸侯之患則城于東方而以
仲山甫此二臣之德懃於其君於其爲國之本末與其所先後

可謂知之矣慮之以悄悄之勞而發之以赫赫之名乘之以翼
翼之勤而續之以明明之功蓋其君臣如此而守衛之有其具
也今余公亦以文武之材當明天子承平日久於補弊立廢之
時鎮撫一方修捍其民其勤於今與周之南仲仲山甫蓋等矣
是宜有記也

律詩

送張子智移師入桂

楊廷秀

握刀將帥迎牙纛龍尾名臣進寶奎虎頭移鎮赴喀溪解辨戎
蠻貢象犀翠浪玉虹餘昨夢碧參羅帶入新題鳳池雞枥公栖
處早個雲飛不要梯

送鄭權尚書南海

王建

城頭龍腦舖關口象牙堆物設薰爐出蠻辭晚節開市喧山賊
破金賤海船來白氎家家織紅蕉處處栽已將身報國莫起望
鄉臺

送桂州嚴大夫

韓愈

蒼蒼森八桂茲地在湘南江作青羅帶山如碧玉簪戶多輸翠
羽家自種黃柑遠勝登仙遠飛鸞不假駢

送靳尚書赴南海

韓愈

衙時龍戶集上日馬人來風靜鷓鴣去官廉蚌蛤回貨通獅子
國樂奏越王臺事事皆殊異無嫌出大才

送嚴大夫赴桂州

白居易

地壓坤方重官兼憲府雄桂林無瘴氣栢省有清風山水衙門
外旌旗艘艤中大夫應絕席詩酒更誰同

送徐大夫赴廣州

劉長卿

上將壇場拜南荒羽檄招遠方來百越元老事三朝霧遶龍川
暗山連象郡遙

送鄭尚書出鎮南海

張籍

牙旆從城展兵符到府開蠻聲吟夜市海色潤朝臺

送李大夫赴廣州

杜甫

斧鉞下青冥樓船過洞庭北風隨爽氣南斗避文星

寄陽桂州

杜甫

五嶺皆炎熱宜人獨桂林梅花萬里外雪片一冬深

送鄭尚書赴南海

韓愈

番禹軍府盛欲說暫停杯蓋海旌旗出連天觀閣開

送嚴大夫

王建

嶺頭分界堠一半屬湘潭水驛門旗出山蠻洞主參

送范經略仲濟

蘇軾

廟堂選世將范氏真名賢仁風被宿麥綠浪搖秦川

留守

歷代沿革漢和帝南巡張禹以太尉兼衛尉留守隋大業九年

代王侑留守西京十二年李淵太原留守王威高君雅為副

唐太宗正觀十七年親征遼東置京城留守以房玄齡充蕭

瑒為副其後車駕不在京都則置留守以金吾大將為副咸

亨二年高宗幸洛陽以維州長史李晦為西京留守其後車

駕發京都則置留守以右金吾大將軍為副留守太原府亦

置尹及少尹以尹為留守少尹為副留守謂之三都留守

代大福七年勅留守之任委寄非輕凡降絲綸宜同將相

今後除留守宜降麻制留守降麻自安彥威始天子巡狩

親征則命親王或大臣總留守事建隆元年親征澤潞以樞

密使吳延祚為東京留守其西南北京留守各一人江南應

天府尹各一人留守尹闕則置知副府事一人以郎中以上

充通判各二人一掌留守一掌府事以朝官充留守司掌官

鑰及京城守衛修葺彈壓之事畿內錢穀兵民之政建炎初

京城有副留守以檢校少傅寧武軍節度使范訥充留守以

侍衛親軍都指揮使遂安軍承宣使郭仲荀副之 又有西京

留守並係執政從臣充兼節制軍馬其後武林建鄴並建行

宮留守從權措置百司事務六年有行宮同留守 以左通奉

大夫孟庾提舉萬壽觀兼侍讀充 詔二留守並權赴尚書省

治事 是年八月三省已降指揮三省樞密院常程事務並聽

行宮留守司與決並權赴尚書省治事 **元** 有兩都留守同

知留守副留守

羣書要語 山國用虎節 周禮 秦使杞子戍鄭掌北門之管 傳謹

守管鑰 漢蕭何 房喬居守聖君無回顧之憂 類要 明星東守命

開府以居留 同上 方委留鎮 白集韓皋留守制 主鑰東門 杜牧

之集 命爾居守俾之保綏 陸集賈耽制 統禦都邑提持紀綱 同

乃眷留都之重 歐公除劉沆制 委以別京之重 文彥博制處

居留之任 賜彥博口宣 守宮鑰之謹嚴 文彥博謝表 卷是別都

之重 溫公賜韓琦詔 近付京都之鑰 荆公除李韓制

古今事貫

別造玉符

傳符之制京都留守曰麟符隋煬帝幸遼東命樊子蓋東都留

守屬楊玄感作逆攻城子蓋備禦有功車駕至高陽追詣行在

所帝勞之比蕭何寇恂且謂曰公宜持重戈甲五百人而後出

此亦勇夫重閉之義無賴不軌者便誅鋤之凡可施行無勞形

迹今為公別造玉麟符以代銅鑿 六典

乃賜鐵券

事文類聚十集 卷之七 七

郭子儀爲京城留守自變生倉卒賴子儀復安帝曰子儀固社稷臣因勞曰用卿晚故至此乃賜鐵券圖形凌烟閣唐職林

臥總留臺

貞觀中太宗幸王華官房玄齡以疾臥總留臺

並加持節

後魏高祖南伐以太尉元丕廣陵王羽留守京師並加持節

宜降絲綸

見沿革注

必賜旗甲

唐元和九年以尚書左丞呂元膺充東都留守舊制命留守必賜旗甲與方鎮略同及元膺受任終無所賜朝論以元膺不寇虞特用元膺不當削其儀制以阻威望諫官上疏曰華汝壽三州

列賜戎械居守之重固宜寵借憲宗曰此數處並不當與其後遂皆停

付六府事

隋楊瓚居守帝謂之曰六府事殷一以相付朕將遂事東方無

西顧之憂

職官分紀

治綠野堂

裴度字中立文宗時留守東都時闔豎檀威權天子擁虛器度不復有經濟意乃治東都綠野堂野服蕭散爲之把酒不問人間事帝知度神明不衰每人自洛來必問度安否

國之元老

唐元宗東巡宋璟爲留守上臨發謂璟曰卿國之元老爲朕股

肱耳目今將巡洛邑為別歷時所有嘉謀嘉猷宜相告也璟因極言得失特賜綵絹等仍手制曰所進言書之坐右出入觀省以誠終身其見重如此

民號良吏

顧少連字夷仲為東都留守表閑田以利民號良吏

任閑中事

漢與諸侯擊楚蕭何守關中以便宜施行上來以聞許戶轉漕給軍漢王數失軍遞去何常與關中卒輒補缺上以此劾厲任何閑中事

漢蕭何傳

無西顧憂

光武曰昔高祖任蕭何於關東無復西顧之憂得專征山東終

成大業

治尚寬簡

源乾曜留守京師治尚寬簡人安之

治以和簡

權德輿治以和簡人以寧便

戎政歡服

劉政武德初留守太原調輯戎政遠近歡服

號令精明

王翊字宏肱為東都留守既至開田二千餘屯修器械皆良金壽革練士卒號令精明吳少誠叛獨東畿為有備

罷守失望

裴度罷東都留守中人使幽鎮還言軍中謂度在朝而兩河諸侯志者懷強者畏今居東人人失望

宗社獲安

荀植留守京師掩獲沙門法秀謀反太后曰宗社獲安實卿之

倉卒復安

郭子儀射生將王撫自署京兆尹亂京城子儀斬以徇帝以子儀為京城留守自變生倉卒賴子儀復安

賜書褒勞

杜暹帝東幸以暹為留守暹率當番衛士繕三宮城浚池督役不少懈帝數賜書褒勞

賜詔寵異

開成中東都留守牛僧孺徵拜左僕射上令左軍副使賁會身宣賜舊例留守入朝無中使賜詔上特寵異之

行留悉總

房玄齡為相會伐遼留守京師詔曰公當蕭何之任朕無西顧之憂凡糧械飛翰行留悉裁總之

治行第一

張延賞為東都留守五年治行第一

或用舊德

唐故事居守之任或用舊德或用故相未嘗以武將而當保釐之重長慶二年以浚郊有事地逼封所以前義武軍節度使陳楚為東都留守且非舊制尋亦改焉

續通典

可倚大事

太宗幸洛陽李大亮副房玄齡居守元齡稱有王陵周勃節可倚大事

有利即行

高宗幸洛陽令河間王孝恭次子晦居守顧曰關中之事一以付卿令式之外有利於人者隨事即行不須聞奏晦累有異迹

久廢復行

崔從寶曆初為東都留守故事留司官入宮城門列辰衙見留守吏誕謾久廢至是復行

團結民兵

國朝葉夢得字少蘊號石林先生公留守建康團結沿江民兵

數萬至是呼集分據江津仍遣其內機宜官模領數千人守馬家渡虜果遣吾叛將鄺瓊以輕兵來犯覺有備而

位置營壘

洪文安公遵知建康徧走郊野位置營壘民居及冢墓無相涉諸將不能易上賜手札曰寨地異同卿挺身任責非乃心王室

疇克爾

全活數千

王沂國公文正公會留守洛陽屬歲歉里有困積者飢者聚黨脅取鄰郡以強盜論公但重笞而釋之遠近聞以為法全活數

千計並同止

條具十事

公知建康府赴闕奏事建康東南巨鎮南渡以來行宮在焉兼掌留鑰選用尤重公對於內殿敷陳時務當先定其規模為不可勝以待敵之可勝又條具十事上嘉納之

鄭克撰呂尚書社行狀

輦下清肅

李沆字太初謚文靖真宗朝戎人寇邊幸鄴沆以宰臣為東京留守不戮一人而輦下清肅

城上親督

劉錡領兵赴東京副留守任抵順昌府得報虜已陷東京公曰某本赴留司今東京既陷幸全軍至此有城池可守當同心力以死報國公親於城上督眾設戰具凡六日而賊退擊之頗殺虜眾既而兀朮親擁兵至公登城會諸將閱策或謂宜具

舟全師而歸公曰朝廷養兵正欲為緩急之用况已挫賊鋒軍聲稍振雖多寡不侔然有進無退公遣數百人出城虜來接戰俄以數千人出南門士殊死鬪虜大敗橫屍盈野賊拔寨遁去

言行錄

畫像以事

王沂公再涖大名治政益信於俗民居軍伍咸畫像以事之時虜使每往復入境皆云此府王公在焉必沐浴潔服後入

捧縑以賜

范成大淳熙中帥江東兼行宮留守陞辭詔明日辭選德殿特設几開宴酒三行命侍行過西小軒曰此朕清坐處也再坐上曰勸卿一杯且有以為侑公飲訖二內侍捧縑素來上有石湖

二大字拜賜進謝上為滿引復袖御書蘇軾詩一軸以賜

聘使書名

韓魏公鎮北門北門為聘使道舊與京尹書皆押字不名及公留守則名于書其副使成禹錫來仍喻來介曰以侍中在此故特名及公去後留守引前比欲得其名強之不可

社稷所重

景德元年駕幸澶淵真宗謂王旦曰京師社稷所重非公不可並同上

特許行留

紹興六年中書門下省言秦檜孟庾並係兼行宮守記特許張蓋

長於彈壓

紹興八年召呂頤浩付以建康頤浩入辭趙鼎曰浩之政長於彈壓建康名郡頗望其來上曰繁劇固以彈壓為先若不動聲色使百姓陰受其賜小人却不知也中興系年錄

古今文集

律詩

寄北都留守裴令公

白居易

天上中台正人間一品高休明值堯舜勳業過蕭曹始擅文三捷終兼武六韜動人名赫赫憂國意忉忉寵重移宮鑰恩新換闔旄保釐東宅靜守護北門牢豹尾交牙戟虬髯捧佩刀通天白犀帶照地帶麟袍

送裴司徒令守太原
劉禹錫
星使出關東兵符賜上公山河歸舊國管籥煥離宮行色旌旗
動軍聲鼓角雄愛棠餘故吏騎竹見新童漢壘三秋靜胡沙萬
里空其如天下望旦夕詠清風

寄東都留守令狐相公

姚合

除書東守洛陽宮恩比藩方任更雄拜表出時傳七刻排班衙
日有三公旌旗嚴動臨闕外侍府洪深接禁中

送薛尚書兼御史大夫東都留守

耿緯

副國威名重春卿禮樂崇賜珪推拜下分命遂居
日清鏡自細風教用儒門雅兵稱武庫雄誰云千載後周呂獨

爲公

詩話

趙老燈臺

歸田錄俚諺云趙老送燈臺一去更不來不知是何等語雖士
大夫亦往往道之天聖中有尚書卽趙世長者常以滑稽自負
其老也求爲西京留臺御史有輕薄子送以詩云此固真是送
燈臺世長深惡之亦以不能酬酢爲恨其後竟卒于留臺

春圃桔槔

熙寧初魏公罷相守北京新進多陵慢之魏公鬱鬱不得志嘗
爲詩曰花去曉叢蜂蝶亂雨勻春圃桔槔閑時人稱其微婉

新編古今事文類聚外集卷之七終

三十三

德壽堂

春回林

登臺毋具彩惡之亦以不設階梯其對黃亭午留臺

其夫少亦為西京... 送以精氣... 回真景...

大夫亦封封... 天聖中... 晉書... 有...

謂曰... 送登臺... 一去更不來... 呼長...

傲步登臺

品

